



PARLAMENTO
DE GALICIA



BOLETÍN OFICIAL DO PARLAMENTO DE GALICIA

X lexislatura
Número 446
21 de marzo de 2019

Fascículo 1



SUMARIO

1. Procedementos parlamentarios

1.1. Procedementos de natureza normativa

1.1.2. Propostas de normas

1.1.2.1. Proxectos e proposicións de lei

1.1.2.1.1. Proxectos de lei

Admisión a trámite e apertura do prazo de presentación de emendas

■ 47930 (10/PL-000013)

Presidencia da Xunta de Galicia

Proxecto de lei de ordenación farmacéutica de Galicia

[152979](#)

1.1.2.1.2. Proposicións de lei

Admisión a trámite

■ 47654 (10/PPL-000035)

Grupo Parlamentario dos Socialistas de Galicia

Proposición de lei de creación da Oficina de Control Orzamentario no Parlamento de Galicia [153093](#)

■ Resolución da Presidencia, do 20 de marzo de 2019, polo que se amplía o prazo de presentación de emendas ao articulado á Proposición de lei orgánica, para presentar perante o Congreso dos Deputados, de transferencias complementarias a Galicia en materia de tráfico, circulación de vehículos e seguranza viaria [10/PPLC-000012 (44486)] [152972](#)

Rexeitamento da toma en consideración

■ 38857 (10/PPL-000028)

Grupo Parlamentario do Bloque Nacionalista Galego

Proposición de lei de memoria histórica democrática de Galicia

[152973](#)

1.3. Procedementos de control e impulso

1.3.5. Mocións

1.3.5.4. Mocións tramitadas

Aprobación por unanimidade con modificacións

■ 47158 (10/MOC-000130)

Grupo Parlamentario dos Socialistas de Galicia

Pierres López, María Luisa

Sobre as melloras que debe implementar e impulsar a Xunta de Galicia en relación coa rede de centros de información á muller. (Moción a consecuencia da Interpelación nº 44310, publicada no BOPG nº 423, do 31.01.2019, e debatida na sesión plenaria do 26.02.2019) [152973](#)



Rexeitamento da iniciativa

I 47155 (10/MOC-000129)

Grupo Parlamentario de En Marea

Quinteiro Araújo, Paula

Sobre as actuacións que debe levar a cabo o Goberno galego en relación co tratamento das informacións en materia de igualdade. (Moción a consecuencia da Interpelación nº 44014, publicada no BOPG nº 417, do 23.01.2019, e debatida na sesión plenaria do 26.02.2019) [152974](#)

I 47162 (10/MOC-000131)

Grupo Parlamentario dos Socialistas de Galicia

Otero Rodríguez, Patricia

Sobre as actuacións que debe levar a cabo o Goberno galego para a igualdade entre mulleres e homes. (Moción a consecuencia da Interpelación nº 25183, publicada no BOPG nº 260, do 14.02.2018, e debatida na sesión plenaria do 26.02.2019) [152974](#)

1.3.6. Proposicións non de lei

1.3.6.1. Proposicións non de lei en Pleno

1.3.6.1.4. Proposicións tramitadas

Aprobación sen modificacións

I 6062 (10/PNP-000523)

Grupo Parlamentario Popular de Galicia

Pazos Couñago, José Alberto e oito deputados/as máis

Sobre a demanda do Goberno galego ao Concello de Vigo para que retorne ao consenso acordado para a modificación da Lei da área metropolitana de Vigo e ao cumprimento desta, así como do cumprimento do convenio asinado en materia de transporte metropolitano garantindo as mesmas tarifas para todas as persoas usuarias con independencia do seu lugar de procedencia [152975](#)

I 44557 (10/PNP-003328)

Grupo Parlamentario Popular de Galicia

Novo Fariña, María Isabel e seis deputados/as máis

Sobre as demandas que debe realizar o Goberno galego ao Goberno central co fin de cubrir as vacantes na Unidade de Policía Adscrita a Galicia e de incrementar os seus efectivos ata un mínimo de catrocentos setenta e cinco [152975](#)

Aprobación por unanimidade sen modificacións

I 45704 (10/PNP-003429)

Grupo Parlamentario do Bloque Nacionalista Galego

Presas Bergantiños, Noa e cinco deputados/as máis

Sobre as actuacións que debe impulsar o Goberno galego para a incorporación de cláusulas de igualdade na contratación pública de Galicia [152976](#)



Rexeitamento da iniciativa

I 42689 (10/PNP-003205)

Grupo Parlamentario dos Socialistas de Galicia

Torrado Quintela, Julio e Blanco Rodríguez, Noela

Sobre o impulso da Xunta de Galicia para convocar unha xuntanza da mesa sectorial que trate os problemas específicos dos colectivos de profesionais de PAC, servizos de urxencias e transporte sanitario urxente

[152976](#)

I 43460 (10/PNP-003247)

Grupo Parlamentario do Bloque Nacionalista Galego

Prado Cores, María Montserrat e cinco deputados/as máis

Sobre as medidas que debe adoptar o Goberno galego para a mellora da situación da atención primaria

[152977](#)

I 44794 (10/PNP-003350)

Grupo Parlamentario de En Marea

Solla Fernández, Eva

Sobre a elaboración pola Xunta de Galicia dun plan de mellora da atención primaria, así como as actuacións que debe levar a cabo en relación coa dotación de persoal e horarios de traballo dos puntos de atención continuada

[152977](#)

I 45209 (10/PNP-003393)

Grupo Parlamentario dos Socialistas de Galicia

Fernández Leiceaga, Xoaquín María e dous deputados/as máis

Sobre as actuacións que debe levar a cabo a Xunta de Galicia en relación coa asunción de novas competencias pola Comunidade Autónoma

[152977](#)

I 46293 (10/PNP-003467)

Grupo Parlamentario de En Marea

Quinteiro Araújo, Paula e dous deputados/as máis

Sobre as actuacións que debe levar a cabo o Goberno galego e as demandas que debe realizar ao Goberno central en relación coa fenda salarial de xénero e as desigualdades existentes no mercado laboral, así como coa revalorización das pensións

[152978](#)

3. Administración do Parlamento de Galicia

3.2. Recursos humanos

I Puntuacións definitivas do concurso-oposición para ingresar por promoción interna nunha praza do corpo superior (DOG núm. 93, do 16 de maio de 2018)

[152978](#)



1. Procedementos parlamentarios

1.1. Procedementos de natureza normativa

1.1.2. Propostas de normas

1.1.2.1. Proxectos e proposicións de lei

1.1.2.1.1. Proxectos de lei

A Mesa do Parlamento, na súa sesión do día 20 de marzo de 2019, adoptou o seguinte acordo:

Admisión a trámite e apertura do prazo de presentación de emendas

- 47930 (10/PL-000013)

Presidencia da Xunta de Galicia

Proxecto de lei de ordenación farmacéutica de Galicia

Examinado o devandito proxecto e logo de verificar que reúne a documentación e os antecedentes previstos no artigo 111 do Regulamento, a Mesa, por unanimidade, acorda:

1º. Admitir a trámite o Proxecto de lei de ordenación farmacéutica de Galicia, polo procedemento lexislativo ordinario.

2º. Asignalo, oída a Xunta de Portavoces, na súa reunión do 20 de marzo de 2019, á Comisión 5ª, Sanidade, Política Social e Emprego, e ordenar a súa publicación no *Boletín Oficial do Parlamento de Galicia*.

3º. Abrir o prazo regulamentario de 15 días hábiles para a presentación de emendas, que comezará a contar a partir do día seguinte ao da publicación no *Boletín Oficial do Parlamento de Galicia*. O prazo remata o día 8 de abril de 2019, ás 18.30 horas.

Santiago de Compostela, 20 de marzo de 2019

Miguel Ángel Santalices Vieira

Presidente

1.1.2.1.2. Proposicións de lei

A Mesa do Parlamento, na súa sesión do día 20 de marzo de 2019, adoptou o seguinte acordo:

Admisión a trámite

- 47654 (10/PPL-000035)

Grupo Parlamentario dos Socialistas de Galicia

Proposición de lei de creación da Oficina de Control Orzamentario no Parlamento de Galicia

A Mesa toma coñecemento da referida iniciativa e, dado que vén presentada nos termos previstos no artigo 122 do Regulamento da Cámara, acorda:



1º. Admitir a trámite a Proposición de lei de creación da Oficina de Control Orzamentario no Parlamento de Galicia.

2º. Dispoñer o seu traslado á Xunta de Galicia para que emita o informe previsto no Decreto lexislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia en materia de igualdade, e para que manifieste o seu criterio e a súa conformidade respecto da súa tramitación nos termos previstos no artigo 123.2 do Regulamento.

3º. Ordenar a súa publicación no *Boletín Oficial do Parlamento de Galicia*.

Santiago de Compostela, 20 de marzo de 2019

Miguel Ángel Santalices Vieira

Presidente

Resolución da Presidencia, do 20 de marzo de 2019, polo que se amplía o prazo de presentación de emendas ao articulado á Proposición de lei orgánica, para presentar perante o Congreso dos Deputados, de transferencias complementarias a Galicia en materia de tráfico, circulación de vehículos e seguranza viaria [10/PPLC-000012 (44486)]

No Rexistro Xeral do Parlamento de Galicia tivo entrada, co número 47939, o escrito do G. P. de En Marea polo que se solicita a ampliación do prazo para a presentación de emendas ao articulado á Proposición de lei orgánica, para presentar perante o Congreso dos Deputados, de transferencias complementarias a Galicia en materia de tráfico, circulación de vehículos e seguranza viaria [10/PPLC-000012 (44486)].

A Presidencia, tendo en conta a inmediatez da conclusión do prazo —o día 25 de marzo de 2019—, en uso da delegación temporal de competencias de xestión ordinaria da Mesa do Parlamento na Presidencia da Cámara (Acordo da Mesa do Parlamento do 31 de outubro de 2016, publicado no *Boletín Oficial do Parlamento de Galicia* núm. 9, do 8 de novembro de 2016), resolve:

1º. Admitir a trámite o documento número de rexistro de entrada 47939, presentado polo G. P. de En Marea.

2º. Ampliar, por primeira vez, o prazo de presentación de emendas ao articulado á Proposición de lei orgánica, para presentar perante o Congreso dos Deputados, de transferencias complementarias a Galicia en materia de tráfico, circulación de vehículos e seguranza viaria [10/PPLC-000012 (44486)], ata o día 3 de abril, ás 18.30 horas.

3º. Dar conta deste acordo á Mesa e á Xunta de Portavoces.

4º. Notificar este acordo aos grupos parlamentarios.

5º. Publicar este acordo no *Boletín Oficial do Parlamento de Galicia*.

Santiago de Compostela, 20 de marzo de 2019

Miguel Ángel Santalices Vieira

Presidente



O Pleno do Parlamento, na sesión do 12 de marzo de 2019, adoptou os seguintes acordos:

1.1.2.1.2. Proposicións de lei

Rexeitamento da toma en consideración

- 38857 (10/PPL-000028)

Grupo Parlamentario do Bloque Nacionalista Galego

Proposición de lei de memoria histórica democrática de Galicia

BOPG nº 374, do 19.10.2018

Sometida a votación, obtense o resultado de 32 votos a favor, 39 votos en contra e ningunha abstención, polo que non se toma en consideración.

1.3. Procedementos de control e impulso

1.3.5. Mocións

1.3.5.4. Mocións tramitadas

Aprobación por unanimidade con modificacións

- 47158 (10/MOC-000130)

Grupo Parlamentario dos Socialistas de Galicia

Pierres López, María Luisa

Sobre as melloras que debe implementar e impulsar a Xunta de Galicia en relación coa rede de centros de información á muller. (Moción a consecuencia da Interpelación nº 44310, publicada no BOPG nº 423, do 31.01.2019, e debatida na sesión plenaria do 26.02.2019)

BOPG nº 441, do 06.03.2019

Sométese a votación e resulta aprobada, con modificacións respecto do texto orixinal, pola unanimidade dos 71 deputados e deputadas presentes.

O texto aprobado é o seguinte:

«O Parlamento galego insta a Xunta de Galicia a implementar e impulsar as seguintes melloras na Rede CIM de Galicia e que permitan garantir o servizo integral e de calidade para todas as mulleres galegas, independentemente da súa localización no territorio, mellorando a accesibilidade aos servizos:

1. Consolidación da Rede integral de CIM en todo o territorio, especialmente no rural galego, impulsando, en colaboración cos diferentes concellos, a apertura de máis centros, independentes ou mancomunados, e que permitan cubrir a totalidade do territorio galego no horizonte do ano 2020.

2. Fomento da cooperación institucional e entre os propios CIM, así como de maior cooperación interautonómica, co fin de intercambiar experiencias e crear protocolos que permitan coordinar e optimizar as actuacións en materia de violencia de xénero.



3. Mellora do funcionamento da plataforma Xestión CIM, e revisión e estudo de melloras no sistema de implementación de datos para a xustificación das actuacións dos CIM, para velar pola confidencialidade na atención ás usuarias.

4. Estender o Programa de inserción laboral para mulleres vítimas de violencia de xénero iniciado no ano 2016 a través das entidades de iniciativa social sen ánimo de lucro, neste ano 2019 ás entidades locais, así como ao tecido empresarial.

5. Seguir a apoiar a Rede autonómica de centros de información á muller, garantindo o financiamento dos recursos económicos necesarios máis aló do período actual vixente dos fondos europeos así como dos medios técnicos precisos; fomentar que nas entidades locais incorporen perfís profesionais a maiores dos que se recollen no artigo 10 do Decreto 130/2016, do 15 de setembro, polo que se establecen os requisitos e o procedemento para o recoñecemento e acreditación dos centros de información á muller de titularidade das entidades locais de Galicia.

6. Implementar, desde o vindeiro ano 2020, a presentación durante o mes de xaneiro do programa e axenda anual de formación dos e das profesionais dos CIM, atendendo ás realidades dos colectivos atendidos nestes centros (LGTBI, inmigrantes, mulleres e menores vítimas de violencia de xénero...) e as súas problemáticas (traumas, dependencia emocional, apego, adiccións e traumas) así como outras formacións suxeridas nos informes das memorias anuais dos CIM de toda Galicia.»

Rexeitamento da iniciativa

- 47155 (10/MOC-000129)

Grupo Parlamentario de En Marea

Quinteiro Araújo, Paula

Sobre as actuacións que debe levar a cabo o Goberno galego en relación co tratamento das informacións en materia de igualdade. (Moción a consecuencia da Interpelación nº 44014, publicada no BOPG nº 417, do 23.01.2019, e debatida na sesión plenaria do 26.02.2019)

BOPG nº 441, do 06.03.2019

Sométese a votación e resulta rexeitada por 32 votos a favor, 39 votos en contra e ningunha abstención.

- 47162 (10/MOC-000131)

Grupo Parlamentario dos Socialistas de Galicia

Otero Rodríguez, Patricia

Sobre as actuacións que debe levar a cabo o Goberno galego para a igualdade entre mulleres e homes. (Moción a consecuencia da Interpelación nº 25183, publicada no BOPG nº 260, do 14.02.2018, e debatida na sesión plenaria do 26.02.2019)

BOPG nº 441, do 06.03.2019

Sométese a votación e resulta rexeitada por 31 votos a favor, 39 votos en contra e ningunha abstención.



1.3.6. Propositions non de lei

1.3.6.1. Propositions non de lei en Pleno

1.3.6.1.4. Propositions tramitadas

Aprobación sen modificacións

- 6062 (10/PNP-000523)

Grupo Parlamentario Popular de Galicia

Pazos Couñago, José Alberto e oito deputados/as máis

Sobre a demanda do Goberno galego ao Concello de Vigo para que retorne ao consenso acadado para a modificación da Lei da área metropolitana de Vigo e ao cumprimento desta, así como do cumprimento do convenio asinado en materia de transporte metropolitano garantindo as mesmas tarifas para todas as persoas usuarias con independencia do seu lugar de procedencia
BOPG nº 83, do 15.03.2017

Sométese a votación e resulta aprobada sen modificacións por 37 votos a favor, 27 votos en contra e 6 abstencións.

O texto aprobado é o seguinte:

«O Parlamento de Galicia insta a Xunta de Galicia a:

1. Dirixirse ao Concello de Vigo para solicitarlle o retorno ao consenso entre os concellos e o Goberno galego que permitiu a modificación da lei da Área Metropolitana de Vigo e a súa aprobación por unanimidade no Parlamento de Galicia, así como a exixirle o seu cumprimento.

2. Demandarlle ao Concello de Vigo que cumpra o convenio asinado en materia de transporte metropolitano, garantindo as mesmas tarifas para todas as persoas usuarias, con independencia do seu lugar de procedencia.»

- 44557 (10/PNP-003328)

Grupo Parlamentario Popular de Galicia

Novo Fariña, María Isabel e seis deputados/as máis

Sobre as demandas que debe realizar o Goberno galego ao Goberno central co fin de cubrir as vacantes na Unidade de Policía Adscrita a Galicia e de incrementar os seus efectivos ata un mínimo de catrocentos setenta e cinco
BOPG nº 423, do 31.01.2019

Sométese a votación e resulta aprobada sen modificacións por 50 votos a favor, 20 votos en contra e ningunha abstención.

O texto aprobado é o seguinte:

«O Parlamento de Galicia insta a Xunta de Galicia a solicitar ao Goberno do Estado que por parte do Ministerio do Interior, a través da Dirección Xeral da Policía, se articule un concurso de méritos na Policía Nacional que permita cubrir vacantes na Unidade de Policía Adscrita para incrementar



canto menos ata 475 os seus efectivos, de xeito que esta unidade poida cumprir coas funcións que actualmente está prestando.»

Aprobación por unanimidade sen modificacións

- 45704 (10/PNP-003429)

Grupo Parlamentario do Bloque Nacionalista Galego

Presas Bergantiños, Noa e cinco deputados/as máis

Sobre as actuacións que debe impulsar o Goberno galego para a incorporación de cláusulas de igualdade na contratación pública de Galicia

BOPG nº 430, do 13.02.2019

Sométese a votación e resulta aprobada sen modificacións pola unanimidade dos 70 deputados e deputadas presentes.

O texto aprobado é o seguinte:

«O Parlamento galego insta a Xunta de Galicia a impulsar as seguintes accións para a incorporación de cláusulas de igualdade na contratación pública galega:

1. Definir e aprobar, en colaboración coas forzas políticas, sindicais e axentes sociais e económicos, no prazo de 6 meses o proceso metodolóxico para a implantación de cláusulas de igualdade onde se teña en conta: diagnose, planificación para a posta en marcha e mecanismos de avaliación.
2. Designar unha comisión responsable do seguimento do proceso e da avaliación periódica na que obrigatoriamente estea incorporada unha persoa representante da Secretaría Xeral de Igualdade.
3. Garantir un grupo técnico multidisciplinar para fornecer a asistencia técnica especializada que precisen as áreas de goberno.
4. Elaborar e remitir á Cámara galega un informe anual da implantación progresiva das cláusulas de igualdade que incorpore información tanto estatística como cualitativa e a difusión de experiencias e boas prácticas.
5. Impulsar as modificacións legais oportunas para blindar legalmente a obrigatoriedade da inclusión deste tipo de cláusulas na contratación pública galega.»

Rexeitamento da iniciativa

- 42689 (10/PNP-003205)

Grupo Parlamentario dos Socialistas de Galicia

Torrado Quintela, Julio e Blanco Rodríguez, Noela

Sobre o impulso da Xunta de Galicia para convocar unha xuntanza da mesa sectorial que trate os problemas específicos dos colectivos de profesionais de PAC, servizos de urxencias e transporte sanitario urxente

BOPG nº 414, do 18.01.2019



Sométese a votación e resulta rexeitada por 33 votos a favor, 37 en contra e ningunha abstención.

- 43460 (10/PNP-003247)

Grupo Parlamentario do Bloque Nacionalista Galego

Prado Cores, María Montserrat e cinco deputados/as máis

Sobre as medidas que debe adoptar o Goberno galego para a mellora da situación da atención primaria

BOPG nº 417, do 23.01.2019

Sométese a votación e resulta rexeitada por 33 votos a favor, 37 en contra e ningunha abstención.

- 44794 (10/PNP-003350)

Grupo Parlamentario de En Marea

Solla Fernández, Eva

Sobre a elaboración pola Xunta de Galicia dun plan de mellora da atención primaria, así como as actuacións que debe levar a cabo en relación coa dotación de persoal e horarios de traballo dos puntos de atención continuada

BOPG nº 427, do 06.02.2019

Sométese a votación e resulta rexeitada por 33 votos a favor, 37 en contra e ningunha abstención.

- 45209 (10/PNP-003393)

Grupo Parlamentario dos Socialistas de Galicia

Fernández Leiceaga, Xoaquín María e dous deputados/as máis

Sobre as actuacións que debe levar a cabo a Xunta de Galicia en relación coa asunción de novas competencias pola Comunidade Autónoma

BOPG nº 430, do 13.02.2019

Sométese a votación e resulta rexeitada por 33 votos a favor, 36 en contra e ningunha abstención.

- 46293 (10/PNP-003467)

Grupo Parlamentario de En Marea

Quinteiro Araújo, Paula e dous deputados/as máis

Sobre as actuacións que debe levar a cabo o Goberno galego e as demandas que debe realizar ao Goberno central en relación coa fenda salarial de xénero e as desigualdades existentes no mercado laboral, así como coa revalorización das pensións

BOPG nº 434, do 20.02.2019

Sométese a votación e resulta rexeitada por 20 votos a favor, 37 en contra e 13 abstencións.

Santiago de Compostela, 14 de marzo de 2019

Miguel Ángel Santalices Vieira

Presidente



3. Administración do Parlamento de Galicia

3.2. Recursos humanos

Puntuacións definitivas do concurso-oposición para ingresar por promoción interna nunha praza do corpo superior (DOG núm. 93, do 16 de maio de 2018)

Puntuacións definitivas do concurso-oposición. Lista de aprobados

	Oposición	Concurso	Total
María Rosa Buceta López	39 puntos	6,65 puntos	45,65 puntos

Santiago de Compostela, 18 de marzo de 2019

Xosé Antón Sarmiento Méndez

Presidente do tribunal







XUNTA DE GALICIA

VICEPRESIDENCIA E CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA
Dirección Xeral de Relacións Institucionais
e Parlamentarias

galicia

Ref: AG



Para a súa tramitación polo Parlamento de Galicia achégolle o "**Proxecto de lei de ordenación farmacéutica de Galicia**", aprobado polo Consello da Xunta de Galicia na súa reunión do día 7 de marzo de 2019.

Asemade achégase a certificación expedida polo secretario do Consello co visto e praxe do Sr. Presidente da Xunta de Galicia, así como os documentos aos que se refire o artigo 111 do Regulamento da Cámara.

Santiago de Compostela,

A directora xeral de Relacións Institucionais e Parlamentarias

(ASINADO DIXITALMENTE)

Sr. presidente do Parlamento de Galicia



Xacobeo 2021





XUNTA DE GALICIA

ALFONSO RUEDA VALENZUELA, VICEPRESIDENTE E CONSELLEIRO DE PRESIDENCIA, ADMINISTRACIÓNS PÚBLICAS E XUSTIZA E SECRETARIO DO CONSELLO DA XUNTA DE GALICIA,

CERTIFICO:

Que o Consello da Xunta de Galicia, na súa reunión do día sete de marzo dous mil dezanove, adoptou, entre outros, o seguinte acordo:

“Aprobar o *Proxecto de lei de ordenación farmacéutica de Galicia*, e a súa remisión ao Parlamento de Galicia”.

E para que conste asino a presente, co visto e prace do Sr. Presidente, en Santiago de Compostela a sete de marzo dous mil dezanove.


Vº e Prace
O PRESIDENTE





XUNTA DE GALICIA

PROXECTO DE LEI DE ORDENACIÓN FARMACÉUTICA DE GALICIA





EXPOSICIÓN DE MOTIVOS

I


O artigo 43 da Constitución Española recoñece o dereito á protección da saúde, atribuíndo aos poderes públicos a organización e tutela da saúde pública, a través de medidas preventivas e das prestacións e servizos necesarios.

Consonte co artigo 103 da Lei 14/1986, do 25 de abril, xeral de sanidade, as oficinas de farmacia abertas ao público son establecementos sanitarios suxeitos á planificación sanitaria nos termos establecidos pola lexislación especial de medicamentos e farmacias.

A Lei 16/1997, de 25 de abril, de regulación de servizos das oficinas de Farmacia, co obxecto de mellorar a atención farmacéutica á poboación establece o marco xurídico básico, que debe ser completado polas comunidades autónomas competentes na materia.

Neste sentido, o artigo 28.8 do Estatuto de autonomía dispón que é competencia da Comunidade Autónoma galega o desenvolvemento lexislativo e a execución da lexislación do Estado nos termos que a mesma estableza en materia de establecementos farmacéuticos. E, conforme ao seu artigo 33 corresponde á Comunidade Autónoma de Galicia o desenvolvemento lexislativo e a execución da lexislación básica do Estado en materia de sanidade interior e a execución da lexislación do Estado sobre produtos farmacéuticos, engadindo o dito precepto, no seu número 4, que a Comunidade Autónoma poderá organizar e administrar a tales fins e dentro do seu territorio todos os servizos relacionados coas materias antes expresadas, e exercerá a tutela das institucións, entidades e fundacións en materia de Sanidade e Seguridade Social, reservándose o Estado a alta inspección conducente ao cumprimento das funcións e competencias contidas no precepto.

Pola súa banda, o texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, do 24 de xullo, fixa os criterios básicos de ordenación do sector farmacéutico, tanto no que atinxe aos establecementos farmacéuticos como ao uso racional dos medicamentos, encomendando ás diferentes administracións con competencias en materia de sanidade, a ordenación das oficinas de farmacia, servizos farmacéuticos e prestacións farmacéuticas.





A Lei 5/1999, do 21 de maio, de ordenación farmacéutica, regulou ata o de agora a atención farmacéutica na nosa Comunidade Autónoma. Durante os dezanove anos transcorridos desde a súa entrada en vigor a dita lei foi obxecto de modificacións parciais. En primeiro lugar, pola Lei 4/2005, do 17 de marzo, co obxecto de reformar determinados aspectos da regulación do traslado e transmisión das oficinas de farmacia, así como introducir cambios na regulación da clasificación das unidades de radiofarmacia.

Posteriormente foi modificada pola Lei 7/2006, do 1 de decembro, co fin de eliminar a limitación da idade máxima de 65 anos para solicitar a autorización dunha oficina de farmacia, en atención aos razoamentos expostos polo Tribunal Superior de Xustiza de Galicia no auto no que este tribunal decidiu a formulación de cuestión de inconstitucionalidade no seo do recurso contencioso-administrativo número 4787/2001, interposto pola Federación de Empresarios Farmacéuticos de Galicia.

A terceira modificación efectuouse pola Lei 12/2011, do 26 de decembro, de medidas fiscais e administrativas. Neste caso as modificacións afectaron aos criterios a ter en conta na organización do réxime das quendas de garda das oficinas de farmacia, aos supostos de establecemento obrigatorio de servizos de farmacia nos hospitais, centros de asistencia social e psiquiátricos e aos recursos humanos cos que deberían contar, aos casos nos que poderían autorizarse depósitos de medicamentos e produtos sanitarios e ás súas funcións, e, finalmente, ao réxime sancionador, co obxecto de incorporar novas infraccións e actualizar o réxime das sancións inicialmente previstas.

A derradeira modificación efectuouse pola Lei 9/2017, do 26 de decembro, de medidas fiscais e administrativas, afectando neste caso ao réxime de transmisión das novas oficinas de farmacia adxudicadas por concurso público, ampliando, ata os quince anos, o período mínimo para poder efectuar a transmisión daquelas e adaptando a esta modificación a regulación da rexencia.

Non entanto, estas modificacións parciais resultaron insuficientes, polo que cómpre acometer unha nova regulación integral da atención farmacéutica, máis acorde co presente e que permita afrontar e dar solución, de maneira máis eficaz, ás actuais necesidades e demandas tanto dos/das profesionais farmacéuticos/as como das persoas usuarias.





Esta nova regulación vén imposta ademais pola necesidade de adaptación da normativa autonómica á normativa estatal de obrigado cumprimento ditada con posterioridade á Lei 5/1999, do 21 de maio, como é o caso da contida no vixente texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, do 24 de xullo.

II

O obxecto desta lei é a regulación da atención farmacéutica en Galicia, entendida como un servizo de interese público que comprende un conxunto de actuacións que deben prestarse en tódolos niveles do noso sistema sanitario, dirixidas a garantirlle á cidadanía o acceso rápido, eficaz, oportuno, equitativo e racional aos medicamentos e produtos sanitarios que precise. Un servizo que ademais contribúa a facer un uso racional e eficiente deles nos distintos niveis de asistencia sanitaria e no ámbito da saúde pública, que sempre deberá ser prestado baixo a responsabilidade e supervisión dos/das profesionais farmacéuticos/as, en relación coa adquisición, custodia, conservación, distribución e dispensación de medicamentos e produtos sanitarios.

A regulación da atención farmacéutica realízase desde unha perspectiva ampla, integradora dos diferentes sectores que levan a cabo a dispensación de medicamentos e produtos sanitarios. Por tal motivo, esta lei regula a atención farmacéutica prestada a través das oficinas de farmacia e boticas anexas, así como a prestada a nivel de atención primaria e especializada, e nas entidades prestadoras de servizos sociais e outros centros sanitarios. Perseguindo en todo caso, unha actuación coordinada dos distintos niveis, para ofrecerlle á cidadanía una atención farmacéutica integral.

As razóns anteriormente expostas son as que motivan a necesidade e oportunidade de promulgar unha nova lei máis acorde cos novos tempos, para o cal se contemplan distintas novidades respecto da regulación legal autonómica existente ata o de agora.

Así por un lado, a experiencia acumulada pola consellería competente en materia de sanidade ao longo deste tempo no ámbito das oficinas de farmacia, puxo de manifesto a necesidade de establecer uns procedementos de adxudicación de novas oficinas de farmacia mais áxiles e rápidos. Por este motivo, o inicio dos





concursos públicos de adxudicación das novas oficinas de farmacia efectuarase só de oficio pola consellería competente en materia de sanidade.

Ademais, co obxecto de lograr unha maior profesionalización deste sector, promover a racionalización da planificación farmacéutica, a regularización e reorganización do mapa farmacéutico, se introduce como novidade a convocatoria dun concurso previo de traslados ao que poderán concorrer os/as farmacéuticos/as titulares ou cotitulares dunha oficina de farmacia establecida na Comunidade Autónoma de Galicia. Con posterioridade, convocarase outro concurso para a provisión das oficinas de farmacia vacantes resultantes do concurso de traslado, que englobará tanto as novas oficinas de farmacia recollidas no mapa farmacéutico non cubertas como aquelas que quedaran libres por traslado da persoa titular sempre e cando se manteñan as razóns de interese público que o aconsellen e sigan sendo necesarias, á vista dos módulos poboacionais previstos nesta nova lei. A este procedemento poderán concorrer tódolos/as farmacéuticos/as que no momento de finalización do prazo de presentación de solicitudes fixado na convocatoria sexan ou non titulares ou cotitulares dunha oficina de farmacia, establecida dentro ou fóra da nosa comunidade, que non a teñan transmitido nos dez anos anteriores á dita data.

Outras novidades a destacar neste ámbito son a inclusión da esixencia de constitución de garantías a efectos do concurso público de adxudicación de novas oficinas de farmacia, de cara a asegurar a continuidade do dito procedemento así como a desaparición do suposto da caducidade das autorizacións administrativas por cumprimento da idade de 70 anos das persoas titulares delas ou a necesidade de autorización de nomeamento dun/dunha farmacéutico/a rexente nos casos de xubilación desta/a persoa/s. Non obstante, en todo caso, no momento de cumprir o/a farmacéutico/a titular ou cotitular a idade de 70 anos e de continuar exercendo dita función, resultará obrigada a contratación dun/dunha ou varios/as farmacéuticos/as adxuntos/as adicionais, segundo se determine regulamentariamente, a efectos de garantir a prestación dun servizo de calidade e coas máximas garantías, polo indubidable impacto que este ten na saúde da cidadanía.

Entre as novidades mais salientables destaca tamén a redución do período de duración da rexencia, que pasa dos cinco aos dous anos, agás nos casos de falecemento cando algún dos herdeiros en primeiro grao estea cursando estudos de farmacia, ou de incapacidade total ou absoluta do/a farmacéutico/a se non reúne os requisitos para a xubilación, nos que poderá estenderse ata un máximo





de cinco anos. Esta nova lei tamén acolle e adapta o réxime de transmisión de oficinas de farmacia introducido xa na modificación efectuada pola Lei 9/2017, do 26 de decembro, no artigo 23.2 da anterior Lei 5/1999, do 21 de maio, na que se ampliaba o período esixido para poder proceder á transmisión das oficinas de farmacia adxudicadas polo procedemento de concurso público dos 3 aos 15 anos, contados dende a apertura ao público da oficina de farmacia, agás nos casos taxados previstos na lei, entre os cales non se recolle agora o suposto de xubilación do/a farmacéutico/a titular, o que resulta coherente trala eliminación da caducidade da autorización ao cumprir estes/as os 70 anos. Nesta liña cómpre salientar que, acorde co anterior, tampouco se recolle agora a xubilación entre os supostos nos que pode autorizarse o nomeamento dun rexente, o cal si permitía o artigo 12 da Lei 5/1999, do 21 de maio.

Polo que respecta á atención farmacéutica prestada nas oficinas de farmacia, a lei recolle expresamente a prohibición de desenvolver nos locais das oficinas de farmacia actividades de venda ao público de produtos distintos dos propios do canal farmacéutico ou actividades comerciais por sociedades mercantís ou outras entidades con personalidade xurídica diferenciada do/da farmacéutico/a titular ou da dos/as farmacéuticos/as cotitulares, con independencia de que o domicilio social radique na propia oficina de farmacia ou noutro lugar distinto. Ao mesmo tempo, prohibéase o arrendamento, o subarrendamento ou cesión, a título oneroso ou gratuíto, do uso dos locais das oficinas de farmacia a terceiras persoas distintas da persoa titular para o desenvolvemento de calquera actividade, incluso cando esas actividades teñan relación co ámbito sanitario.

Resulta tamén salientable como novidade neste eido a inclusión da posibilidade de que de xeito excepcional, e cando se cumpran determinados requisitos, a atención farmacéutica poida ser prestada domiciliariamente e a obriga de presenza física da persoa titular ou, no seu caso, dun/dunha cotitular, rexente ou substituto/a na oficina de farmacia de maneira habitual durante o horario de atención ao público, para realizar as funcións correspondentes a estes establecementos.

En materia de boticas anexas, destaca a incorporación da posibilidade de que no mapa farmacéutico se prevea, xunto á nova oficina de farmacia, a instalación dunha botica anexa vinculada a ela naquelas zonas especiais de difícil accesibilidade. A lei tamén recolle a posibilidade de proceder á autorización dunha botica anexa para prestar a atención farmacéutica naqueles casos nos que





se concedera unha autorización de traslado ou situación de peche que dificulte o acceso á atención farmacéutica da poboación.

No que atinxe ao establecemento das oficinas de farmacia, sexa por razón de nova instalación ou de cambio de localización, exceptúase o requisito de respectar a distancia mínima de 250 metros naquelas zonas farmacéuticas que contén cunha única oficina de farmacia, sempre e cando concorran razóns de interese xeral que así o xustifiquen. Ademais, naquelas oficinas de farmacia para cuxa instalación e apertura se tivese fixado unha delimitación territorial concreta, a obriga de respectar a dita delimitación no traslado poderá exceptuarse sempre e cando non se manteñan as condicións que motivaron a súa instalación nesa delimitación.

En materia de cambios de localización, a lei incorpora tamén a posibilidade de limitalos cando se aprecie que no caso de ser autorizados se produza un detrimento grave do servizo farmacéutico na zona en que se localiza a oficina de farmacia, en especial naqueles núcleos nos que soamente exista a oficina de farmacia establecida, sempre e cando se manteñan as condicións que motivaron a súa autorización inicial. Por último, a lei tamén incorpora o réxime de reforma dos locais de oficinas de farmacia, o cal non estaba regulado ata o de agora.

Respecto á atención farmacéutica prestada a nivel de atención primaria e nos hospitais, centros de asistencia social e outros centros, servizos e establecementos sanitarios, actualízanse as funcións das correspondentes unidades e servizos de farmacia, e se recollen as correspondentes ás unidades de radiofarmacia, consonte á normativa estatal de aplicación.

Así mesmo, a lei regula as entidades de distribución de medicamentos de uso humano e veterinario e produtos sanitarios, os depósitos de medicamentos e produtos sanitarios e outros aspectos relacionados coa información, promoción e publicidade de medicamentos e produtos sanitarios, e prohibe toda forma de publicidade e promoción das oficinas de farmacia, agás nos casos establecidos regulamentariamente, así como a organización de eventos ou actividades e a utilización de ferramentas que poidan implicar unha promoción da oficina de farmacia co fin de non interferir no dereito de libre elección de oficina de farmacia por parte da cidadanía.

Se establece por último, un novo réxime de incompatibilidades dos/das profesionais farmacéuticos/as e un novo réxime sancionador, o cal inclúe unha





relación exhaustiva das infraccións e as correspondentes sancións, a salvo en todo caso das establecidas no texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, do 24 de xullo, e o prazo para resolver e notificar as resolucións ditadas nos expedientes por infraccións en materia de establecementos farmacéuticos e medicamentos, produtos sanitarios, cosméticos e produtos de coidado persoal. Inclúese entre as sancións a de revogación da autorización daquelas oficinas de farmacia nas que se verifique o incumprimento de xeito reiterado e inxustificado da obriga da dispensación de medicación que lles sexa solicitada pola cidadanía nas condicións legal e regulamentariamente establecidas.

III

A lei estrutúrase en dez títulos.

O título preliminar define o seu obxecto e ámbito de aplicación, que é o de regular a atención farmacéutica no ámbito territorial da Comunidade Autónoma de Galicia.

O título I está adicado á atención farmacéutica. No capítulo I relativo ás disposicións xerais, defínese a atención farmacéutica, enuméranse cales son os establecementos e servizos encargados da mesma, as modalidades e prohibicións de venda de medicamentos e produtos sanitarios para a venda directa aso/ás profesionais da medicina, odontoloxía, veterinaria e podoloxía exclusivamente dos medicamentos necesarios para o exercicio da súa actividade profesional e os supostos especiais de entrega de medicamentos e produtos sanitarios.

O capítulo II refírese aos dereitos e obrigas, tanto dos establecementos e servizos de atención farmacéutica como da cidadanía, garantindo, entre aqueles, o dereito á saúde da mesma nos casos de exercicio do dereito á obxección de conciencia.

Finalmente, no capítulo III establécese o réxime das autorizacións administrativas nos establecementos e servizos de atención farmacéutica.

O título II regula a atención farmacéutica no nivel da atención primaria, dividíndose en tres capítulos. O capítulo I, correspondente ás oficinas de farmacia, subdivídese en 7 seccións, relativas á súa definición, funcións condicións e requisitos xerais; titularidade e persoal; atención ao público;





planificación e ordenación territorial de novas oficinas de farmacia; procedemento de outorgamento da autorización de instalación de novas oficinas de farmacia; cambios de localización, reforma de local e limitacións; transmisión e peche.

No capítulo II establécense as condicións para a apertura de boticas anexas. Como novidade a destacar incorpórase a posibilidade de que no trámite de planificación da autorización de novas oficinas de farmacia, xunto á nova oficina de farmacia se prevea a instalación dunha botica anexa vinculada a ela naquelas zonas de difícil accesibilidade.

Finalmente, o capítulo III recolle a definición e establece as funcións das unidades de farmacia nos centros de atención primaria, deixando para unha regulación posterior a determinación das condicións, requisitos e os recursos materiais e humanos cos que deben contar as ditas unidades.

Pola súa banda, o título III trata da atención farmacéutica nos hospitais, centros de asistencia social e outros centros, servizos e establecementos sanitarios, regulando nel tamén os depósitos de medicamentos e produtos sanitarios. Nel se establecen os supostos nos que será obrigatorio contar cun servizo de farmacia propio, se regulan as súas funcións así como os recursos materiais e humanos dos que deben dispor.

Segundo o establecido no título IV, a distribución de dos medicamentos autorizados realizarase a través de das entidades de distribución ou directamente polo laboratorio titular da autorización de comercialización daqueles. Estas entidades e, no seu caso, os laboratorios farmacéuticos que distribúan directamente os seus produtos, deberán dispoñer do persoal, dos locais, instalacións e equipos adecuados e suficientes para garantir a adecuada conservación e distribución dos medicamentos, e deberán cumprir os requisitos establecidos na normativa aplicable así como nas normas de boas prácticas de distribución de medicamentos de uso humano. A lei tamén incorpora a prohibición do arrendamento, subarrendo ou cesión a terceiras persoas, dos locais ou instalacións das entidades de distribución. Ademais esixe o nomeamento dun/ dunha director/a técnico/a farmacéutico/a, cuxo cargo será incompatible co desempeño profesional doutras actividades de carácter sanitario que supoñan intereses directos coa fabricación ou dispensación de medicamentos e produtos sanitarios, ou que resulten en detrimento do adecuado cumprimento das súas funcións.





O título V está adicado ás unidades de radiofarmacia. Nel establécese que a elaboración dos medicamentos radiofármacos de uso humano axustarase á normativa que os regule. Tamén recolle os tipos de unidades, as autorizacións, os seus recursos humanos e as funcións destas. A lei prevé que en todo caso, a persoa responsable destas unidades debe ser un/unha facultativo/a especialista en radiofarmacia. Asemade, para o funcionamento destas unidades é requisito inescusable a presenza do/a dito facultativo/a.

O título VI refírese á distribución e dispensación de medicamentos veterinarios, e nel se establece que se levará a cabo nos establecementos e servizos e nas condicións establecidas pola normativa estatal aplicable, pola presente lei e polas normas regulamentarias autonómicas que poidan ditarse. Co obxecto de facilitar a distribución dos medicamentos veterinarios desde os laboratorios fabricantes e as entidades importadoras aos establecementos e servizos de dispensación autorizados, a lei prevé a posibilidade de mediación dos centros de distribución de medicamentos veterinarios.

O título VII está adicado aos/ás profesionais farmacéuticos/as e outro persoal dos establecementos e servizos de atención farmacéutica. A lei define aos/ás profesionais farmacéuticos como aquelas persoas que, posuíndo a titulación correspondente, desenvolvan as súas funcións nos establecementos e servizos de atención farmacéutica regulados nela. De acordo co establecido no dito título, a consellería competente en materia de sanidade, en colaboración coas universidades, os colexios oficiais de farmacéuticos, sociedades científicas e outras organizacións profesionais, impulsará a formación continuada dos/as profesionais farmacéuticos/as e do persoal auxiliar dos establecementos e servizos de atención farmacéutica, coa finalidade de ofrecer unha prestación útil e eficiente á cidadanía a través da actualización dos seus coñecementos. Finalmente, o citado título recolle o réxime de incompatibilidades no exercicio profesional farmacéutico nos establecementos e servizos que a lei regula.

O título VIII regula a publicidade, e promoción e información dos medicamentos, e produtos sanitarios prevendo a adopción das medidas oportunas para garantir que a información, a promoción e a publicidade dos medicamentos e produtos sanitarios, destinadas aos/ás profesionais da saúde ou á poboación en xeral, se axusten a criterios de veracidade, evitando inducir a unha utilización incorrecta ou a un sobre consumo.





No título IX regúlase o réxime sancionador, e nel se recollen os tipos de infraccións sanitarias, as sancións, as medidas cautelares que poidan ser adoptadas, a duración do procedemento e os prazos de prescrición das infraccións e sancións impostas.

Por último, con respecto ás disposicións adicionais, transitorias, derogatorias e derradeiras, cabe destacar a posibilidade, incluída na disposición adicional única, de instrumentar a colaboración entre a administración sanitaria, os colexios oficiais de farmacéuticos, organizacións non gobernamentais, organizacións e colectivos representativos do sector, a través da subscripción de convenios de colaboración. Complétase o texto con cinco disposicións transitorias: a primeira, relativa á aplicación das disposicións regulamentarias vixentes en tanto non se aproben as normas de desenvolvemento previstas na lei, en todo o que non se opoñan ao disposto nela; a segunda relativa ao réxime aplicable aos distintos procedementos sobre autorización de nova instalación, apertura e funcionamento, reforma, cambio de localización, transmisión e peche de oficinas de farmacia iniciados con anterioridade á entrada en vigor da lei, así como os procedementos sancionadores que se atopen en tramitación na data de entrada en vigor da presente lei. A terceira relativa ás regras aplicables aos locais das oficinas de farmacia en función da súa data de inicio; a cuarta relativa aos criterios temporais de aplicación do réxime de garda e vacacións; e a quinta e última sobre o réxime de transmisión das oficinas de farmacia afectadas polo concurso de adxudicación de novas oficinas de farmacia convocado por Resolución do do 2 de xullo de 2018, da Secretaría Xeral Técnica da Consellería de Sanidade, pola que se convoca concurso público para a adxudicación de novas oficinas de farmacia.

Pechan o texto unha disposición derogatoria única e dúas finais, nas que se recolle unha habilitación ao Consello da Xunta para ditar as normas necesarias para o seu desenvolvemento, e o prazo de entrada en vigor da lei, respectivamente.

O anteproxecto foi sometido ao preceptivo ditame do Consello Económico e Social de Galicia.





XUNTA DE GALICIA

TÍTULO PRELIMINAR

Disposicións xerais

Artigo 1. *Obxecto e ámbito de aplicación*

O obxecto desta lei é regular a atención farmacéutica no ámbito territorial da Comunidade Autónoma de Galicia.

[Faint signature or stamp]





TÍTULO I
A atención farmacéutica
CAPÍTULO I
Disposicións xerais

Artigo 2. A atención farmacéutica

1. A atención farmacéutica é un servizo de interese público que garante o acceso da cidadanía aos medicamentos e produtos sanitarios e que contribúe a facer un uso racional e eficiente deles, tanto nos distintos niveis de asistencia sanitaria coma no campo da saúde pública.
2. As actividades que constitúen a atención farmacéutica, encamiñadas á correcta adquisición, conservación, custodia, distribución e dispensación dos medicamentos e produtos sanitarios, faranse baixo a responsabilidade e supervisión dun/dunha farmacéutico/a nos establecementos e servizos sinalados nesta lei.
3. A administración garantirá que a atención farmacéutica se preste en tódolos niveis do sistema de saúde de modo coordinado e integrado e que lle ofrezca á cidadanía unha asistencia eficaz, completa e eficiente.





Artigo 3. Establecementos e servizos de atención farmacéutica

1. Para os efectos desta lei, son establecementos e servizos de atención farmacéutica os seguintes:

a) De dispensación:

1º. As oficinas de farmacia.

2º. As boticas anexas.

3º. As unidades de farmacia dos centros de atención primaria, os servizos de farmacia dos hospitais e os dos centros de asistencia social que presten asistencia sanitaria específica.

4º. Os depósitos de medicamentos e produtos sanitarios.

5º. As unidades de radiofarmacia.

b) De distribución:

As entidades de distribución de medicamentos de uso humano e produtos sanitarios.

2. A distribución e dispensación de medicamentos veterinarios realizarase nos establecementos e servizos que se determinan no artigo 67.





XUNTA DE GALICIA

Artigo 4. *Dispensación de medicamentos e produtos sanitarios*


A dispensación de medicamentos e produtos sanitarios só poderá facerse nos establecementos e servizos previstos para tal fin nos números 1.a) e 2 do artigo 3, e nas condicións establecidas para a súa autorización.





Artigo 5. Modalidades de venda de medicamentos e produtos sanitarios e prohibicións

1. As modalidades e as prohibicións de venda de medicamentos e produtos sanitarios, así como os requisitos para a venda directa aos/ás profesionais da medicina, odontoloxía, veterinaria e podoloxía, exclusivamente, dos medicamentos necesarios para o exercicio da súa actividade profesional, rexeranse polo disposto na normativa aplicable reguladora de tales materias.
2. Queda prohibida calquera tipo de venda indirecta ao público de produtos sanitarios.
3. Queda tamén prohibida a entrega de regalos ou obsequios que non teñan a condición de mostras, como método vinculado á promoción e venda ao público de medicamentos e produtos sanitarios.





Artigo 6. Supostos especiais de entrega de medicamentos e produtos sanitarios

1. Excepcionalmente, á/s persoa/s usuaria/s que resida/n en zonas rurais illadas ou sexa/n dependente/s, cunhas características e necesidades asistenciais específicas, nos/nas que concorran perda de autonomía funcional e necesidade de coidados por enfermidades crónicas, poderán serlles dispensados os medicamentos e produtos sanitarios, con entrega informada destes no seu domicilio e con cumprimento das garantías en materia de dispensación de medicamentos e produtos sanitarios impostas pola normativa aplicable, por unha oficina de farmacia situada na súa zona farmacéutica ou, por expresa decisión do/a paciente, por outra oficina de farmacia da mesma área de referencia do Punto de Atención Continuada.

2. Asemade, estableceranse regulamentariamente as condicións e requisitos aos que deberá axustarse o procedemento mediante o cal o Servizo Galego de Saúde poderá realizar a entrega informada no lugar de residencia da/s persoa/s usuaria/s, e con cumprimento das garantías en materia de dispensación de medicamentos e produtos sanitarios impostas pola normativa aplicable, daqueles medicamentos cuxa dispensación estea restrinxida unicamente ao ámbito hospitalario de acordo coa normativa estatal vixente, entrega na que poderán colaborar as oficinas de farmacia da zona.

Este procedemento só poderá aplicarse con carácter excepcional nos supostos que se determinen, en aras a favorecer a continuidade asistencial e evitar o desprazamento do/a paciente ao hospital.





CAPÍTULO II Dereitos e obrigas

Artigo 7. *Obrigas dos establecementos e servizos de atención farmacéutica*

1. Os establecementos e servizos de atención farmacéutica previstos nesta lei teñen as seguintes obrigas:

a) Conservar os medicamentos e produtos sanitarios nas condicións establecidas na súa autorización, para o que disporán dos equipos necesarios e levarán rexistros de control de temperatura e humidade na súas instalacións.

b) Garantir a recepción, almacenamento e subministro dos medicamentos e produtos sanitarios en condicións de seguridade e sen exposición a condicións meteorolóxicas adversas.

c) Contar co persoal farmacéutico e técnico e auxiliar necesario e suficiente para o desenvolvemento da súas funcións e con sometemento aos requisitos que en cada caso se determinen.

d) Facilitar ás autoridades sanitarias a información que se lles demande en relación coa actividade desenvolvida.

e) No caso dos establecementos e servizos de dispensación, non dispensar os medicamentos solicitados cando existan dúbidas razoables sobre a lexitimidade da súa prescrición, así como poñelo en coñecemento da Administración sanitaria que resulte competente a efectos de determinar a existencia de posibles infraccións administrativas ou penais.

2. Os establecementos e servizos de atención farmacéutica estarán suxeitos no seu funcionamento, no relativo aos medicamentos de uso humano ou veterinario, ao control e inspección dos servizos de inspección da consellería competente en materia de sanidade, sen prexuízo das atribucións dos servizos veterinarios oficiais da consellería competente en materia de gandería en relación coas inspeccións dos establecementos de dispensación de medicamentos veterinarios, agrupacións gandeiras con programa sanitario e entidades de distribución de medicamentos veterinarios, as boticas anexas, ou respecto a venda a distancia ao público ou por outros canles de medicamentos non suxeitos a prescrición veterinaria.


3. Os establecementos e servizos de atención farmacéutica regulados nesta lei





XUNTA DE GALICIA

estarán suxeitos ao rexistro e catalogación e á obriga de elaboración e remisión das informacións que lles sexan requiridas. Igualmente, estarán suxeitos ao cumprimento das obrigas derivadas do principio de solidariedade e integración sanitaria, en casos de emerxencia ou de perigo para a saúde pública.



CSV: AYPH2tcu12
Verificación:
<https://sede.parlamentodegalicia.gal/tramites/csv/>





Artigo 8. Dereitos e obrigas da cidadanía

1. En materia de atención farmacéutica, ademais dos recollidos na restante normativa aplicable, recoñécense os seguintes dereitos da cidadanía:

- a) Elixir libremente a oficina de farmacia.
- b) Recibir un trato correcto e a prestación farmacéutica precisa que lles corresponda.
- c) Obter do/a farmacéutico/a a información que solicite do medicamento ou produto sanitario, sexa de carácter técnico ou económico, con claridade e por escrito se así o solicita.
- d) Coñecer e ter acceso aos datos do seu historial fármaco-terapéutico nas condicións que se establezan regulamentariamente.
- e) Recibir atención farmacéutica garantindo a privacidade e confidencialidade das persoas usuarias.
- f) Coñecer a identidade e cualificación profesional da persoa que lle presta a atención farmacéutica.

2. Así mesmo, en relación á atención farmacéutica, establécense as seguintes obrigas da cidadanía:

- a) Cumprir as prescricións económicas e administrativas establecidas pola normativa reguladora da obtención de medicamentos e, no seu caso, de produtos sanitarios, e en particular, as establecidas para a prestación farmacéutica con cargo a fondos públicos.
- b) Acreditar o dereito á prestación farmacéutica do Sistema Nacional de Saúde e a derivada de convenios especiais nos casos de exercicio dese dereito.
- c) Identificarse no acto da dispensación de medicamentos naqueles casos en que sexa requisito obrigado.
- d) Tratar co respecto debido ao persoal dos establecementos e servizos de atención farmacéutica.
- e) Usar as instalacións dos establecementos e servizos de atención farmacéutica de forma axeitada.
- f) Facer un uso responsable dos medicamentos e produtos sanitarios.





Artigo 9. *Obxección de conciencia*

A administración sanitaria garantirá que o dereito á obxección de conciencia dos/as profesionais farmacéuticos/as non limite ou condicione o dereito á saúde da cidadanía. A tal fin, no caso de exercicio do dereito á obxección de conciencia, poderán adoptarse as medidas excepcionais que, preservando o dito dereito, garantan o dereito á saúde da cidadanía.






CAPÍTULO III

Réxime de autorizacións administrativas nos establecementos e servizos de atención farmacéutica

Artigo 10. Réxime de autorizacións e competencia

1. Respecto dos establecementos e servizos de atención farmacéutica regulados nesta lei será esixible a obtención de autorización administrativa previa nos supostos e nos termos previstos nela e na restante normativa a eles aplicable.
2. Corresponde á consellería competente en materia de sanidade a tramitación dos procedementos de autorización e dos restantes procedementos regulados nesta lei cando tal tramitación sexa de competencia autonómica, coa excepción dos supostos nos que, en relación cos medicamentos veterinarios e cos establecementos de distribución e dispensación dos ditos medicamentos, a dita competencia se atribúe á consellería competente en materia de gandería.





Artigo 11. *Procedementos de autorización*

1. Os procedementos relativos ás autorizacións previstas nesta lei que tramite a Administración autonómica, axustaranse ao disposto nela e na normativa reguladora do procedemento administrativo común das administracións públicas.
2. Transcorrido o prazo para resolver sen que se ditase e notificase resolución expresa, as solicitudes entenderanse desestimadas.
3. Con carácter previo ao outorgamento da autorización autonómica relativa á apertura e posta en funcionamento, transmisión, cambio de localización ou reforma das instalacións, comprobarase que se cumpren todos os requisitos establecidos, deixando constancia deste extremo na correspondente acta.





TÍTULO II
A atención farmacéutica no nivel da atención primaria
CAPÍTULO I
As oficinas de farmacia

Sección 1ª. Definición, funcións e condicións e requisitos xerais

Artigo 12. Definición e funcións


A oficina de farmacia é un establecemento sanitario privado de interese público, integrado na atención primaria, cuxa propiedade e titularidade pode pertencer a un/unha ou máis farmacéuticos/as, que baixo a súa responsabilidade dirixen e supervisan as seguintes funcións:

- a) Adquirir, conservar e custodiar os medicamentos e produtos sanitarios.
- b) Dispensar medicamentos e produtos sanitarios, de acordo coa prescrición médica ou veterinaria, ou segundo as orientacións técnico-farmacéuticas para aqueles con autorización para seren dispensados sen receita.
- c) Emitir, no caso de dispensación de medicamentos, un recibo co contido previsto na normativa estatal aplicable. Así mesmo, no momento de dispensar un produto sanitario, emitirán un recibo no que conste o nome do produto, o seu prezo de venda ao público e a achega da persoa usuaria.
- d) Facilitar sistemas personalizados de dosificación aos/ás pacientes que o soliciten, en orde a mellorar o cumprimento terapéutico, nos tratamentos e coas condicións e requisitos que se establezan regulamentariamente.
- e) Informar, aconsellar e instruír respecto dos medicamentos e produtos sanitarios que dispense/n, coa incidencia en aspectos que favorezan unha correcta utilización.
- f) Colaborar no seguimento farmacoterapéutico individualizado co fin de avaliar a súa efectividade e detectar os fracasos por incumprimento terapéutico, así como de detectar as reaccións adversas e notificárllelas aos organismos de farmacovixilancia.
- g) Vixiar, controlar e custodiar as receitas médicas dispensadas, polo tempo establecido pola normativa específica.





- h) Colaborar no uso racional dos medicamentos e produtos sanitarios, así como na protección e promoción da saúde
- i) Realizar análises clínicas e outras funcións profesionais ou sanitarias que, por estaren recollidas en normas específicas e conforme ao disposto nelas, poidan ser desenvolvidas polo/a farmacéutico/a de acordo coa súa titulación e especialidade.
- j) Participar en estudos de utilización de medicamentos, así como en estudos epidemiolóxicos.
- k) Colaborar en programas de saúde pública e drogodependencias.
- l) Colaborar coas medidas tendentes á racionalización do gasto en medicamentos.
- m) Colaborar na formación para a obtención do título de grao de farmacia de acordo coas universidades e coa normativa estatal aplicable.
- n) Calquera outra que se estableza legal ou regulamentariamente.





XUNTA DE GALICIA

Artigo 13. Colaboración das oficinas de farmacia no desempeño da prestación farmacéutica do Sistema Nacional de Saúde

Poderán establecerse concertos cos colexios oficiais de farmacéuticos de Galicia para a colaboración das oficinas de farmacia no desempeño da prestación farmacéutica do Sistema Nacional de Saúde.

[Faint, illegible handwritten text]






Artigo 14. *Outras actividades*

1. Queda prohibido desenvolver nos locais da oficina de farmacia actividades de venda ao público de produtos distintos dos propios do canal farmacéutico, considerando como tales os medicamentos, os produtos sanitarios e os produtos de parafarmacia.

2. Cando nunha oficina de farmacia se desenvolvan actividades de óptica, análises clínicas, ortopedia, audioprótese, nutrición ou calquera outra actividade sanitaria expresamente autorizada para o seu exercicio nos locais da oficina de farmacia, a persoa titular ou, no caso de ser varias, polo menos unha das persoas cotitulares deberán estar en posesión do título correspondente para o exercicio de dita actividade e cumprir os demais requirimentos que se determinen. Malia isto, as persoas titulares poderán contratar a profesionais coa titulación correspondente para seren asistidos no desenvolvemento de tales actividades.

3. Nos locais da oficina de farmacia non se poderán desenvolver actividades comerciais por sociedades mercantís ou outras entidades con personalidade xurídica diferenciada do/a farmacéutico/a titular ou dos/as farmacéuticos/as cotitulares, con independencia de que o domicilio social radique na propia oficina de farmacia ou noutro lugar distinto.


4. Así mesmo, queda prohibido o arrendamento, o subarrendamento ou a cesión, a título oneroso ou gratuito, do uso dos locais da oficina de farmacia a terceiras persoas para o desenvolvemento de calquera actividade, incluso cando esas actividades teñan relación co ámbito sanitario.





Artigo 15. *Acceso ás oficinas de farmacias*


1. As oficinas de farmacia terán acceso directo, libre e permanente desde á vía pública ou desde zonas de uso colectivo, á zona de dispensación e atención á/ás persoa/s usuaria/s, e deberán cumprir a lexislación en materia de accesibilidade e eliminación de barreiras arquitectónicas.
2. Queda prohibida a entrada e permanencia de animais na oficina de farmacia, agás no caso de cans de asistencia.





Artigo 16. *Requisitos dos locais*

1. Os locais das oficinas de farmacia disporán dunha superficie útil mínima de setenta metros cadrados. De ocupar mais dunha planta, estas serán contiguas e estarán comunicadas entre si.
2. Os locais das oficinas de farmacia reunirán as condicións hixiénico-sanitarias precisas para prestar unha asistencia farmacéutica correcta.
3. As oficinas de farmacia deberán contar cun equipamento informático adecuado para o desenvolvemento das súas funcións e cos outros medios técnicos e materiais que se prevean na normativa básica estatal e nas normas que, respectando esta normativa, se diten en desenvolvemento da presente lei.
4. As condicións de humidade e de temperatura serán as precisas para a conservación dos medicamentos, materias primas empregadas na formulación maxistral, e produtos sanitarios que vaian dispensarse na oficina de farmacia.
5. Así mesmo, o chan, paredes e teitos deberán ser dunha natureza que permita unha limpeza e desinfección adecuadas, e deberán manterse nun bo estado de conservación, respectando sempre o uso previsto para cada unha das zonas ás que fai referencia o artigo seguinte.






Artigo 17. *Zonas das oficinas de farmacia*

1. As oficinas de farmacia contarán coas seguintes zonas:

- a) De dispensación e atención á/ás persoa/s usuaria/s.
- b) De recepción, revisión e almacenamento de medicamentos e produtos sanitarios.
- c) De toma de mostras, en caso de realizar análises clínicas.
- d) De atención individualizada, garantindo a privacidade e confidencialidade.
- e) De descanso para as gardas.
- f) Aseo para uso do persoal da oficina de farmacia.
- g) En caso de realizar formulación, de laboratorio para a elaboración de fórmulas maxistrais e preparados oficinais.

2. Cando nas oficinas de farmacia se desenvolvan outras actividades sanitarias para as que a persoa titular ou as persoas cotitulares contén coa preceptiva autorización e titulación, aquelas deberán dispoñer dos espazos adicionais que regulamentariamente se determinen.





Sección 2ª. Titularidade e persoal

Artigo 18. Titularidade das oficinas de farmacia


1. Só os/as farmacéuticos/as poderán ser propietarios/as e titulares das oficinas de farmacia. Cada farmacéutico/a soamente poderá ser propietario/a e titular ou copropietario/a e cotitular dunha única oficina de farmacia. A condición de copropietario/a comporta necesariamente a adquisición da condición de cotitular e viceversa, así como a de director/a técnico/a da oficina de farmacia.
2. O/A farmacéutico/a titular ou os/as farmacéuticos/as cotitulares son os/as que obtiveron a autorización de instalación, apertura e funcionamento dunha oficina de farmacia, e baixo a responsabilidade dos/das que se exercen nesta as funcións descritas no artigo 12. Deberán tamén dispoñer da propiedade ou dos dereitos de natureza real ou persoal que lexitimen a utilización do local no que se instale a oficina de farmacia.
3. Todos/as os/as farmacéuticos/as cotitulares responderán solidariamente, con independencia do grao de participación de cada un/unha deles/as na propiedade da oficina de farmacia, da correcta prestación da atención farmacéutica na oficina de farmacia, do cumprimento das restantes obrigas que corresponden ás persoas titulares das oficinas de farmacia e das infraccións e sancións derivadas do incumprimento de tales obrigas, de acordo, neste último caso, co disposto no inciso final do artigo 28.3 da Lei 40/2015, do 1 de outubro, do Réxime Xurídico do Sector Público.
4. En caso de cotitularidade non se permitirán cotas de participación inferiores ao 10% da oficina de farmacia.





Artigo 19. *Farmacéutico/a rexente*

1. Nos casos de falecemento, incapacidade permanente non parcial, incapacitación xudicial ou declaración xudicial de ausencia do/a farmacéutico/a titular ou cotitular, poderá autorizarse o nomeamento dun/dunha farmacéutico/a rexente, que asumirá as mesmas funcións, responsabilidades e incompatibilidades profesionais que as sinaladas para a persoa titular ou cotitular.
2. Nos supostos anteriores, non será precisa a designación dun/dunha farmacéutico/a rexente nos casos de cotitularidade da oficina de farmacia, cando tódalas partes estean de acordo e un dos/as cotitulares asuma a responsabilidade da persoa cotitular na que concorra algunha das causas determinadas no número 1.
3. A solicitude de nomeamento de rexente deberá formularse no prazo máximo de vinte días desde o falecemento, a declaración de incapacidade permanente non parcial, a incapacitación xudicial ou a declaración xudicial de ausencia. Se durante este prazo a oficina de farmacia permanecese aberta, deberá estar atendida por un/unha farmacéutico/a. En caso contrario deberá permanecer pechada ata a incorporación do/a farmacéutico/a rexente.
4. No caso de que só exista un/unha farmacéutico/a titular incurso nalgunha das causas para as que resulta obrigatorio o nomeamento dun/dunha rexente, de non se producir a solicitude á que se refire o número anterior, procederase de oficio a iniciar o expediente de peche da oficina de farmacia.
5. A rexencia terá unha duración máxima de dous anos, agás nos casos de falecemento cando algún dos/as herdeiros/as en primeiro grao estea cursando estudos de farmacia, ou de incapacidade total ou absoluta do/a farmacéutico/a cando non reúna os requisitos para a xubilación, supostos nos que poderá estenderse ata un máximo de cinco anos.





Artigo 20. *Farmacéutico/a substituto/a*

1. Cando a oficina de farmacia teña un/unha único/a titular que deba ausentarse por circunstancias excepcionais e temporais debidamente xustificadas, como vacacións, permiso de maternidade ou paternidade, enfermidade, incapacidade física e/ou psíquica transitorias, estudos relacionados coa profesión, cargos públicos e outras circunstancias análogas que impidan o desenvolvemento das súas funcións, ou aquel/a fose inhabilitado/a profesionalmente ou condeado/a a pena privativa de liberdade que supoña ingreso efectivo en prisión impostas por sentenza penal firme, a consellería competente en materia de sanidade poderá autorizar o nomeamento dun/dunha farmacéutico/a substituto/a. Esta esixencia será aplicable igualmente ás oficinas de farmacia de titularidade única que funcionen en réxime de rexencia.
2. O farmacéutico substituto terá as mesmas funcións e responsabilidades e estará sometido ao mesmo réxime de incompatibilidades profesionais que a persoa titular, ou rexente.
3. A solicitude de nomeamento de farmacéutico/a substituto/a deberá formularse no prazo máximo de cinco días a partir do momento no que se coñeza ou produza a circunstancia que obriga á desatención da farmacia pola persoa titular, ou o rexente. En todo caso, se non hai un /unha farmacéutico/a adxunto, a farmacia permanecerá pechada ata a incorporación do/a farmacéutico/a substituto/a.
4. No caso das vacacións anuais, a duración máxima da substitución será dun mes para cada oficina de farmacia.






Artigo 21. *Farmacéutico/a adxunto/a*

1. Tanto os/as farmacéuticos/as titulares e cotitulares coma os/as rexentes e os/as substitutos/as poderán contar coa colaboración de farmacéuticos/as adxuntos/as.
2. Os casos nos que será necesaria a presenza de farmacéuticos/as adxuntos/as por razón de idade do/a titular ou cotitular, do/da rexente ou do/da substituto/a, así como segundo o volume e a diversidade das funcións da oficina de farmacia, ou o horario ampliado voluntario no que decidise/n exercer, serán establecidos regulamentariamente. En todo caso, ao cumprir o/a farmacéutico/a titular ou cotitular, rexente ou substituto/a a idade de 70 anos, e de continuar exercendo dita función, resultará obrigada a contratación dun/dunha ou varios/as farmacéuticos/as adxuntos/as adicionais, segundo se determine regulamentariamente.

No suposto de que o aumento de actividade proveña das funcións ás que se refire o artigo 12.i), poderá optarse entre a contratación dun/dunha farmacéutico/a adxunto/a ou doutro/a profesional sanitario/a titulado/a competente para o exercicio das ditas funcións.

3. Nos casos de ausencia de carácter ocasional, debidos ao cumprimento de deberes profesionais ou inescusables de carácter persoal ou público, que impidan a presenza do/a titular, cotitular, substituto/a ou rexente, un/unha farmacéutico/a adxunto/a poderá asumir as funcións determinadas no artigo 12, sempre que sexa por un tempo inferior a cinco días. A persoa responsable seguirá sendo, en todo caso, o/a titular, cotitular ou substituto/a da oficina de farmacia ou, se é o caso, o rexente.






Artigo 22. *Autorización de nomeamentos*

1. O procedemento de autorización do nomeamento dun/dunha farmacéutico/a rexente, substituto/a e ou adxunto/a tramitarase preferentemente por vía electrónica.

A autorización concederase logo da comprobación de que a persoa proposta polo/a titular ou cotitulares, rexente, persoas adquirentes mortis causa ou representante legal cumpre coas condicións esixidas nesta lei e naquelas outras que regulamentariamente se determinen.

2. Para autorizar o nomeamento de calquera dos/das farmacéuticos/as contemplados neste artigo deberá acreditarse a sinatura do correspondente contrato de traballo de conformidade coa lexislación laboral, así como a alta no réxime de Seguridade Social que proceda.

3. Non poderán ser nomeadas como farmacéutico/a rexente, adxunto/a ou substituto/a as persoas que teñan a condición de bolseiras.





Artigo 23. *Condicións para o nomeamento de persoal*

As condicións, prazos e restantes requisitos para o nomeamento e exercicio profesional do/a farmacéutico/a titular, cotitular, rexente, substituto/a ou adxunto/a da oficina de farmacia, así como os supostos nos que o/a farmacéutico/a adxunto/a pode pasar a desempeñar a función de substituto/a estableceranse regulamentariamente.





Artigo 24. *Persoal técnico e auxiliar de farmacia*

1. O/a farmacéutico/a titular, cotitular, rexente, ou substituto/a poderá dispor da asistencia do persoal técnico e auxiliar de farmacia necesario para levar a cabo as funcións atribuídas. Este persoal realizará, baixo a dirección e supervisión dun/dunha farmacéutico/a, as funcións propias da súa titulación ou habilitación profesional, así como aquelas outras que lle sexan encomendadas, sempre que non estean reservadas expresamente ao seu desempeño por un unha farmacéutico/a.
2. A contratación realizarase de conformidade co establecido na lexislación laboral sendo obrigada, así mesmo, a afiliación ao réxime correspondente da Seguridade Social.






Sección 3ª. Atención ao público

Artigo 25. Presenza e actuación do/a farmacéutico/a e identificación do persoal


1. A presenza e actuación profesional dun farmacéutico/a na oficina de farmacia é requisito inescusable para levar a cabo as funcións establecidas no artigo 12 e na demais normativa que sexa de aplicación. A colaboración de farmacéuticos/as adxuntos/as, técnicos/as ou auxiliares de farmacia non escusa a responsabilidade do farmacéutico/a titular ou cotitulares da oficina de farmacia, sen prexuízo das responsabilidades administrativas, civís e penais daquel persoal que puidesen derivar en cada caso.
2. A presenza física do/da farmacéutico/a titular ou, no seu caso, dun/dunha cotitular, rexente ou substituto/a na oficina de farmacia de maneira habitual durante o horario de atención ao público, será obrigatoria para realizar as funcións establecidas no artigo 12, consonte coas condicións que regulamentariamente se establezan.
3. Todo o persoal farmacéutico que preste servizos na oficina de farmacia levará o distintivo que o identifique persoal e profesionalmente. Asemade, o resto do persoal que preste o seu servizo na oficina de farmacia deberá ir igualmente provisto do distintivo que o identifique persoal e profesionalmente.





Artigo 26. Sinalización, e publicidade e promoción das oficinas de farmacia

1. Todas as oficinas de farmacia deberán estar convenientemente sinalizadas, mediante un distintivo na fachada onde figure de forma visible a palabra “Farmacia”, e, así mesmo, mediante unha cruz grega ou de Malta de cor verde, que estará acesa durante o horario de atención ao público, tanto no horario mínimo obrigatorio como no horario ampliado voluntario, así como durante o servizo de garda, e apagada fóra destes horarios e servizos.
2. A colocación de carteis indicadores da localización da oficina de farmacia, naqueles casos nos que por razóns de visibilidade da mesma sexan necesarios, requirirá autorización da autoridade sanitaria competente .
3. Co fin de non interferir no dereito de libre elección de oficina de farmacia por parte da cidadanía, prohíbese toda forma de publicidade ou actividade promocional das oficinas de farmacia, agás nos casos que se determinen regulamentariamente así como a organización de eventos ou actividades e a utilización de ferramentas que poidan implicar unha promoción da oficina de farmacia.
4. A palabra “Farmacia” e a cruz verde de identificación, serán de utilización exclusiva para as oficinas de farmacia. Non se poderá usar este termo e simboloxía para outro tipo de establecementos, agás no suposto recollido no artigo 47 referente ás boticas anexas, como establecementos vinculados á oficina de farmacia.





Artigo 27. Horarios e servizos de garda das oficinas farmacia

1. As oficinas de farmacia prestarán os seus servizos en réxime de liberdade e flexibilidade horaria, dentro do necesario respecto ao cumprimento do horario mínimo obrigatorio e do servizo de garda, sendo en todo caso necesaria a presenza física e actuación profesional dun/dunha farmacéutico/a na prestación do servizo.

2. As oficinas de farmacia permanecerán abertas ao público polo menos durante o horario mínimo obrigatorio establecido. A estes efectos, diferénciase entre o horario mínimo obrigatorio e o horario voluntario ampliado conforme ao seguinte:

a) O horario mínimo obrigatorio é aquel que deberá cumprirse por todas as oficinas de farmacia da Comunidade Autónoma de Galicia. Será fixado pola consellería competente en materia de sanidade previo informe dos colexios oficiais de farmacéuticos existentes na nosa Comunidade.

b) O horario ampliado voluntario é aquel que as oficinas de farmacia poden realizar por enriba do mínimo obrigatorio.

3. As persoas titulares das oficinas de farmacia deberán comunicar, con carácter previo o seu horario e o das boticas anexas a elas vinculadas á consellería competente en materia de sanidade, a través dos colexios oficiais de farmacéuticos, quedando así mesmo obrigadas aquelas a manter a continuidade do dito réxime nos termos que aquela lles indique.

4. O servizo de garda é aquel que debe realizarse con carácter obrigatorio para garantir a continuidade da atención farmacéutica.

5. A atención farmacéutica prestada no nivel de atención primaria polas oficinas de farmacia será continuada. Para tal efecto, fóra do horario mínimo obrigatorio a atención farmacéutica estará garantida a través do servizo de garda, que debe realizarse con carácter obrigatorio nos termos previstos nos números seguintes.

6. O servizo de garda atenderase mediante un sistema de quendas elaborado polo colexio oficial de farmacéuticos de cada provincia seguindo os criterios que se establezan por norma regulamentaria, entre os que deberán figurar necesariamente os seguintes:

a) A poboación que se debe atender.

b) A accesibilidade da poboación á atención farmacéutica.





c) A obrigatoriedade de prestación do servizo de garda na área de referencia dos puntos de atención continuada, co fin de garantir a continuidade do proceso de prescrición e dispensación de medicamentos.

En todo caso, os criterios que se establezan deberán aplicarse de forma que permitan en todo momento a cobertura das necesidades asistenciais da poboación.

O dito sistema de quendas deberá ser comunicado polos respectivos colexios á consellería competente en materia de sanidade a efectos de control e comprobación do cumprimento dos criterios establecidos.

7. A información sobre as oficinas de farmacia en servizo de garda figurará en todas as establecidas na zona farmacéutica, en lugar visible desde o exterior. Esta información tamén estará dispoñible e permanentemente actualizada nas páxinas web dos colexios oficiais de farmacéuticos de Galicia.

8. As oficinas de farmacia poderán cesar temporalmente as súas actividades durante o período de vacacións sempre e cando queden debidamente cubertas as necesidades de atención farmacéutica durante as vinte catro horas do día. Correspóndelles aos colexios oficiais de farmacéuticos de cada provincia establecer as quendas de vacacións entre as farmacias interesadas en gozalas, tendo en conta que, como norma xeral deberán permanecer abertas, a lo menos, o cincuenta por cento das oficinas de farmacia de cada zona farmacéutica.

O período vacacional non poderá exceder dun mes ao ano, e deberá ser comunicado á consellería competente en materia de sanidade, a través dos colexios oficiais de farmacéuticos, nos termos que regulamentariamente se establezan.





XUNTA DE GALICIA

Sección 4ª. Planificación e ordenación territorial de novas oficinas de farmacia

Artigo 28. Planificación das oficinas de farmacia

1. A autorización de novas oficinas de farmacia estará sometida a planificación co fin de garantir unha atención farmacéutica conveniente, oportuna e eficiente.
2. Regulamentariamente determinarase a forma na que se cubrirá a atención farmacéutica naquelas zonas farmacéuticas nas que non haxa oficina de farmacia.



CSV: AYPH2tcu12
Verificación:
<https://sede.parlamentodegalicia.gal/tramites/csv/>






Artigo 29. *Zonas farmacéuticas*

1. Tómanse como base de planificación as unidades de atención primaria que, para os efectos da presente lei, se corresponden coas demarcacións municipais nas que se ordena o territorio da Comunidade Autónoma galega, e créanse as zonas farmacéuticas, que se clasifican en:

- a) Zonas farmacéuticas urbanas: correspóndense cos concellos con máis de 30.000 habitantes.
- b) Zonas farmacéuticas semiurbanas: correspóndense cos concellos cun número de habitantes comprendido entre 10.000 e 30.000
- c) Zonas farmacéuticas rurais: correspóndense cos concellos con menos de 10.000 habitantes.

2. Non obstante o anterior, co obxecto de garantir as necesidades de atención farmacéutica que se requiran, tendo en conta as diferentes características xeográficas, demográficas, turísticas e sanitarias, o Consello da Xunta poderá acordar a declaración de determinadas zonas farmacéuticas como especiais.





Artigo 30. *Módulos de poboación*

1. Establécense os seguintes módulos para o cálculo das oficinas de farmacia que correspondan a cada zona:


a) Zonas farmacéuticas urbanas: unha por cada 2.800 habitantes empadroados, agás que se supere esa proporción en 1.500 habitantes, suposto no cal poderá establecerse unha nova oficina de farmacia sempre e cando se constate un incremento neto poboacional desa zona nos últimos 5 anos

b) Zonas farmacéuticas semiurbanas: unha por cada 2.500 habitantes empadroados, agás que se supere esa proporción en 1.500 habitantes, suposto no cal poderá establecerse unha nova oficina de farmacia sempre e cando se constate un incremento neto poboacional desa zona nos últimos 5 anos.

c) Zonas farmacéuticas rurais: unha por cada 2.000 habitantes empadroados, agás que se supere esa proporción en 1.500 habitantes, suposto no cal poderá establecerse unha nova oficina de farmacia sempre e cando se constate un incremento neto poboacional desa zona nos últimos 5 anos.

2. En cada concello poderá haber, alomenos, unha oficina de farmacia


3. Para o cómputo de habitantes terase en conta a poboación que conste na última revisión do padrón municipal vixente no momento de se iniciar os traballos necesarios de cara á aprobación do mapa farmacéutico.





Artigo 31. *Distancias entre as oficinas de farmacia*

1. O establecemento dunha oficina de farmacia por razón de nova instalación ou cambio de localización non poderá facerse a unha distancia inferior a douscentos cincuenta metros doutras oficinas de farmacia ou dun centro público de asistencia sanitaria en funcionamento ou cuxo emprazamento estea previsto pola consellería competente en materia de sanidade.
2. Excepcionalmente naquelas zonas farmacéuticas que contén cunha única oficina de farmacia poderá non esixirse esa distancia mínima cando concorran razóns de interese xeral que así o xustifiquen.
3. Regulamentariamente, fixaranse o procedemento, as condicións e os criterios para efectuar a medición das ditas distancias.
4. Nos cambios de localización forzosos provisionais con obriga de retorno, as distancias mínimas ás que se refire o número 1 deste artigo redúcense a cento vinte e cinco metros.





Artigo 32. *Mapa farmacéutico*


1. Os criterios de planificación farmacéutica contidos nesta lei concretaranse no mapa farmacéutico, que será tramitado de acordo co procedemento regulamentariamente establecido e aprobado polo Consello da Xunta de Galicia.

O mapa farmacéutico relacionará tódalas zonas farmacéuticas da Comunidade Autónoma de Galicia, indicando se se trata de zonas urbanas, semiurbanas ou rurais.

O mapa conterá, entre outros extremos, un anexo coas novas oficinas de farmacia e as súas delimitacións territoriais concretas, indicando as que terán vinculadas unha botica anexa para cubrir as necesidades daqueles lugares nos que, por carecer de entidade suficiente para a instalación dunha oficina de farmacia ou por tratarse de zonas especiais de difícil accesibilidade, non se poida instalar unha nova oficina.

O mapa farmacéutico poderá ser revisado cando se detecten alteracións no padrón ou outras circunstancias que conleven cambios nas necesidades de atención farmacéutica dunha ou varias zonas.

Os concellos ou os colexios oficiais de farmacéuticos interesados poderán instar perante a consellería competente en materia de sanidade a revisión do mapa farmacéutico.






Sección 5ª. Procedemento de outorgamento da autorización de instalación de novas oficinas de farmacia

Artigo 33. Procedemento de outorgamento da autorización de instalación de novas oficinas de farmacia

1. A autorización de instalación de novas oficinas de farmacia outorgarase por concurso público, o cal poderá ser de traslado ou de nova adxudicación. O concurso público de traslados deberá convocarse con carácter previo ao concurso de nova adxudicación.
2. Os concursos que se convoquen respectarán os principios de concorrencia competitiva, publicidade, transparencia, mérito e capacidade.
3. A aqueles profesionais que xa resultaran adxudicatarios dunha oficina de farmacia nun concurso público previo só lles serán computados en posteriores concursos aos que se presenten, como méritos de experiencia profesional e de formación post-graduada, os que sexan posteriores á data de convocatoria do anterior concurso público.





Artigo 34. *Regras de procedemento e de competencia*

1. Os procedementos de adxudicación iniciaranse de oficio, e axustaranse ao disposto nas normas xerais de procedemento administrativo, nesta lei e nas normas que a desenvolvan. A competencia para a iniciación, a tramitación e a resolución dos procedementos corresponderá á consellería competente en materia de sanidade.
2. A resolución pola que se convoque o concurso público de adxudicación conterà, como mínimo, o número e a localización das oficinas de farmacia incluídas naquel, o prazo de presentación das solicitudes e as bases polas que se rexerá o dito concurso.
3. A resolución de convocatoria do concurso establecerá a esixencia de constitución de garantías para asegurar a continuidade no procedemento de instalación de farmacias.
4. O prazo máximo para resolver e publicar a resolución dos concursos de adxudicación será de seis meses, contados desde a data da súa convocatoria.
5. A elección das oficinas de farmacia incluídas nos concursos públicos que se convoquen levarase a cabo nun acto público.
6. A adxudicación de oficinas de farmacia efectuarase atendendo á elección que formularsen as persoas participantes no acto público de elección, por rigoroso orde de maior a menor puntuación total no concurso de que se trate.





XUNTA DE GALICIA

Artigo 35. Efectos da non apertura da oficina de farmacia adxudicada

As persoas adxudicatarias dos concursos de traslado ou de nova apertura que non procedan á apertura da correspondente oficina de farmacia nos termos que regulamentariamente se establezan non poderán participar no seguinte concurso de traslado ou de nova adxudicación, respectivamente, que se convoque.



CSV: AYPH2tcu12
Verificación:
<https://sede.parlamentodegalicia.gal/tramites/csv/>





Artigo 36. *Concurso de traslado*

1. A consellería competente en materia de sanidade convocará, por resolución que se publicará no *Diario Oficial de Galicia* e na súa páxina web o concurso de traslado ás novas oficinas de farmacia incluídas no mapa farmacéutico de Galicia.

2. Só poderán participar no dito concurso os/as farmacéuticos/as titulares ou cotitulares de oficina de farmacia na Comunidade Autónoma de Galicia que na data de finalización do prazo de presentación de solicitudes teñan desenvolvido, polo menos, o seu exercicio profesional como titulares ou cotitulares na mesma oficina de farmacia nos cinco anos anteriores, debendo manter tal condición durante todo o procedemento.


En caso de cotitularidade, os/as farmacéuticos/as cotitulares deberán participar no concurso no mesmo réxime de cotitularidade que ostenten na data de publicación da convocatoria.

3. En ningún caso poderán ser adxudicatarios/as dunha nova oficina de farmacia os/as titulares ou cotitulares dunha oficina de farmacia instalada na mesma zona farmacéutica na que se pretende abrir a nova.

4. O outorgamento da autorización por resolución firme na vía administrativa, dunha oficina de farmacia de nova apertura a un/unha farmacéutico/a que xa fora titular ou cotitular dunha, determinará automaticamente a perda da autorización relativa a esta última, aínda en caso de renuncia á nova oficina adxudicada.

Non obstante, en caso de que contra a resolución de autorización se recorre en vía xurisdiccional, a oficina de farmacia que anteriormente fose de titularidade do adxudicatario/a ou adxudicatarios/as, non entrará en concurso ata que recaia sentenza firme. Se a dita sentenza anulase a autorización efectuada en vía administrativa, aquela oficina de farmacia adxudicaráselle directamente ao que fora o/a seu/súa titular ou cotitular.


5. Regulamentariamente determinarase o momento no que os adxudicatarios deberán proceder a apertura da nova oficina de farmacia co fin de asegurar a continuidade na prestación farmacéutica en todas as zonas.





Artigo 37. *Concurso de nova adxudicación*

1. Logo de concluído o concurso de traslados coa autorización das oficinas de farmacia correspondentes ao mesmo, a consellería competente en materia de sanidade convocará, por resolución que se publicará no *Diario Oficial de Galicia* e na súa páxina web, o concurso de nova adxudicación para o outorgamento das autorizacións das oficinas de farmacia vacantes resultantes do concurso de traslado, que englobará tanto as novas oficinas de farmacia recollidas no mapa farmacéutico non cubertas como aquelas que quedaran libres por traslado da persoa titular, sempre e cando, de acordo cos módulos poboacionais previstos na sección 4ª do Capítulo I do Título II, sigan sendo necesarias.
2. Poderán participar neste concurso de nova adxudicación tódolos/as farmacéuticos/as que no momento de finalización do prazo de presentación de solicitudes fixado na convocatoria sexan ou non titulares ou cotitulares dunha oficina de farmacia, situada dentro ou fóra da Comunidade Autónoma de Galicia, e non a teñan transmitido nos dez anos anteriores á dita data.
3. Naqueles supostos nos que o/a farmacéutico/a estivese obrigado/a a pechar a súa oficina de farmacia a consecuencia da execución dunha sentenza xudicial firme que anule a resolución administrativa que autorizou a súa instalación, non se terá en conta o prazo contemplado no número anterior.






Artigo 38. *Caducidade da autorización*

1. As autorizacións de instalación das oficinas de farmacia caducarán no caso de falecemento, xubilación total, incapacidade permanente non parcial, incapacitación xudicial ou declaración xudicial de ausencia do/a farmacéutico/a titular ou cotitular, sen prexuízo das previsións dos artigos 19 e 46.

En calquera caso, a caducidade dunha autorización e o conseguinte peche da oficina de farmacia non afectarán o réxime legal aplicable aos locais, ás instalacións e ao equipamento, de conformidade co disposto na lexislación civil.

2. No caso de cotitularidade, se a causa da caducidade afectase só a un/unha ou a algúns/algunhas dos/das cotitulares, a súa cota de participación na autorización reverterá a favor do resto de cotitulares na mesma proporción que viñesen ostentando, sempre que non se tivese producido a transmisión, inter vivos ou mortis causa, da cota ou cotas de cotitularidade correspondentes ao/á cotitular ou cotitulares incursos/as na causa de caducidade.





Sección 6ª. Cambio de localización, reforma de local e limitacións

Artigo 39. Cambio de localización, tipos e limitacións

1. O cambio de localización dunha oficina de farmacia só poderá efectuarse dentro da mesma zona farmacéutica.

2. Os cambios de localización das oficinas de farmacia estarán suxeitos a autorización administrativa, así como ás condicións e aos requisitos fixados regulamentariamente a tal efecto.

3. Os cambios de localización estarán suxeitos ás seguintes limitacións:

a) Naquelas oficinas de farmacia para cuxa instalación e apertura se tivese fixada unha delimitación territorial concreta, deberá respectarse o ámbito desta, agás cando a administración sanitaria constate a desaparición das condicións que motivaron a súa instalación nesa delimitación

b) As oficinas de farmacia autorizadas ao abeiro do disposto no artigo 3.1.b) do Real decreto 909/1978, do 14 de abril, polo que se regula o establecemento, transmisión ou integración das oficinas de farmacia, unicamente poderán trasladarse dentro do mesmo núcleo de poboación para o que foran autorizadas.

c) Non se autorizará o cambio de localización cando, de ser autorizado, se producise un detrimento grave do servizo farmacéutico na zona en que se localiza a oficina de farmacia, en especial naqueles núcleos nos que soamente exista a oficina de farmacia establecida, e se manteñan as condicións que motivaron a súa autorización inicial.

4. Os cambios de localización poderán ser voluntarios ou forzosos, e estes últimos poderán ser definitivos ou provisionais, conforme ás seguintes regras:

a) Son cambios de localización forzosos definitivos aqueles nos que a prestación do servizo dunha oficina de farmacia non poida continuar no local no que está instalada e non exista posibilidade de retorno a el, ben polas condicións físicas das instalacións ou ben porque o/a titular ou cotitulares perdesen a dispoñibilidade xurídica do dito local.

b) Son cambios de localización forzosos provisionais os que se produzan por obras, derrubamento ou demolición do edificio e que supoñan a imposibilidade temporal de funcionamento da oficina de farmacia no seu asentamento,





XUNTA DE GALICIA

autorizándose con carácter transitorio o seu funcionamento noutras instalacións, coa obriga do titular a que a oficina de farmacia retorne ao seu primitivo local.

c) Os cambios de localización voluntarios, de carácter definitivo, serán todos os demais que se produzan por instancia do/a titular ou cotitulares da oficina de farmacia, co fin de mellorar as condicións do local, situación e/ou accesibilidade.





Artigo 40. *Autorización de cambio de localización*


1. Será causa de caducidade da autorización de cambio de localización o transcurso do prazo de seis meses, contados desde a notificación da autorización a/ás persoas titulares ou cotitulares, sen que a oficina de farmacia abra ao público na nova localización ou, no caso de cambio de localización forzoso provisional, sen que se producise o retorno ao primitivo local.

Reglamentariamente poderán establecerse excepcións ao cumprimento do prazo nos casos nos que a imposibilidade de retorno sexa debida a causa non imputable á persoa titular ou cotitular da oficina de farmacia.

2. Así mesmo, a través de norma regulamentaria poderá establecerse un procedemento urxente para a autorización que só afectará aos cambios de localización forzosos provisionais.

3. A nova situación da oficina de farmacia nos cambios de localización voluntarios e forzosos definitivos respectará as condicións sinaladas no artigo 31.

4. En todo caso a apertura da oficina de farmacia está suxeita á obtención da preceptiva autorización de funcionamento, de acordo co que regulamentariamente se estableza.





Artigo 41. *Reforma dos locais da oficina de farmacia*

1. As obras que afecten ao acceso, á distribución interior do local ou supoñan ampliación ou redución da súa superficie precisarán da correspondente e autorización. O procedemento de autorización de obras nos locais de oficinas de farmacia establecerase regulamentariamente.
2. Para a realización de calquera outra obra no local deberá presentarse, antes do seu inicio, unha comunicación dirixida á correspondente xefatura territorial da consellería competente en materia de sanidade.
3. Durante a realización das obras garantirase a adecuada prestación da atención farmacéutica, ademais do cumprimento das condicións hixiénico-sanitarias dos medicamentos e produtos sanitarios.
4. As obras deberán iniciarse no prazo máximo de seis meses desde o outorgamento da autorización ou desde a presentación da comunicación, segundo o caso. O transcurso do dito prazo sen que se iniciaran as obras será causa de caducidade da autorización ou, no caso de obras sometidas a comunicación, determinará a necesidade de presentar unha nova comunicación.





Sección 7ª. Transmisión e peche

Artigo 42. Transmisión inter vivos

1. A transmisión intervivos, total ou parcial, de oficinas de farmacia, está suxeita a autorización administrativa, que se outorgará de acordo cos requisitos de procedemento que se determinen regulamentariamente.
2. A transmisión dunha oficina de farmacia a favor doutro/a/s farmacéutico/a/s só poderá levarse a cabo cando leve aberta ao público, baixo titularidade do/s transmitente/s, un mínimo de tres anos, contados dende a data da autorización de funcionamento, agás nos supostos de declaración xudicial de ausencia, incapacitación física ou xurídica do/a/s farmacéutico/a/s titular/es ou dun/dunha dos/as titulares da oficina de farmacia, nos que bastará que a oficina estea aberta ao público na data de produción destas circunstancias, as cales deberán quedar acreditadas no expediente. Tamén se considerarán excepción a este período de tempo mínimo, a declaración da oficina de farmacia como de viabilidade económica comprometida (VEC) ou a solicitude por parte do/a titular ou cotitulares da oficina de farmacia da declaración dun concurso de acredores.
3. A transmisión das oficinas de farmacia adxudicadas a partir da entrada en vigor desta lei polo procedemento de concurso público só poderá levarse a cabo cando leven abertas ao público un mínimo de 15 anos, contados dende a data da autorización de funcionamento. Nos supostos de declaración xudicial de ausencia ou incapacitación xudicial do/da farmacéutico/a titular ou dun/dunha dos/das titulares, bastará que a oficina estea aberta ao público na data de produción destas circunstancias, as cales deberán quedar acreditadas no expediente.
4. No caso de cotitularidade, na transmisión onerosa e ao amparo dos artigos 1521 e seguintes do Código Civil, terán dereito de retracto legal o/a farmacéutico/a cotitular ou, se é o caso, os/as farmacéuticos/as cotitulares proporcionalmente ás súas cotas de participación.





Artigo 43. *Transmisión mortis causa*

1. No caso de falecemento do/a farmacéutico/a titular ou cotitular da oficina de farmacia, os adquirentes mortis causa deberán comunicar a súa vontade, ou non, de nomeamento de farmacéutico/a rexente a efectos de continuar coa oficina de farmacia, agás no suposto que, en caso de cotitularidade, se recolle no artigo 19.2.

A dita comunicación formularase no prazo máximo de vinte días desde o falecemento e deberá ser acompañada da solicitude de nomeamento de rexente. De non se facer neste tempo e modo, a Administración sanitaria iniciará de oficio o expediente de peche da oficina de farmacia.

2. No caso de optar polo nomeamento dun/dunha farmacéutico/a rexente, ata que este non se produza, se a oficina de farmacia non conta con farmacéuticos/as adicionais, deberá permanecer pechada ata a incorporación do/a farmacéutico/a rexente, de acordo co previsto no artigo 19.3.

3. No suposto de falecemento do farmacéutico/a titular ou cotitular, poderán ser titulares ou cotitulares da autorización relativa á oficina de farmacia, nos termos nos que o fose a persoa falecida, o cónxuxe ou algún dos/das herdeiros/as en primeiro grao, sempre que sexan farmacéuticos/as e cumpran os demais requisitos esixidos para ser titular.

4. No suposto de transmisión *mortis causa*, o/a cotitular poderá exercer o seu dereito de retracto legal respecto dun terceiro nos termos previstos na lexislación civil, agás no suposto de que a transmisión se produza a favor do cónxuxe ou calquera dos herdeiros en primeiro grao que, no momento do falecemento do/da cotitular, sexa licenciado/a en Farmacia ou estea cursando estudos de Farmacia, sempre que finalicen estes no prazo de cinco anos.





Artigo 44. Regras aplicables ás transmisións inter vivos

1. As transmisións inter vivos estarán suxeitas ás seguintes regras:

- a) As oficinas de farmacia non poderán transmitirse desde o momento no que a persoa titular presentase solicitude de participación no concurso público de traslados para o outorgamento de autorización respecto doutra oficina de farmacia. Esta limitación manterase ata o esgotamento da vía administrativa en relación co dito concurso público, ou, no caso de recurso, na vía xurisdiccional, ata que recaia sentenza firme.
- b) O outorgamento, por resolución firme na vía administrativa, da autorización para a instalación dunha nova oficina de farmacia a quen xa fose titular doutra determinará a perda automática da autorización relativa a esta última. En consecuencia, non se poderán autorizar as transmisións que, respecto dela pretenda efectuar aquel, agás no caso de anulación xudicial daquela resolución de autorización.
- c) Nos casos de peche provisional obrigatorio dunha oficina de farmacia por inhabilitación profesional ou condena a pena privativa de liberdade que supoña o ingreso efectivo en prisión impostas á persoa titular da oficina de farmacia por sentenza penal firme, este non poderá transmitir a dita oficina de farmacia durante o tempo no que esta permaneza clausurada.

2. O incumprimento do previsto nos apartados a) e c) do número anterior será constitutivo de infracción nos termos previstos na lei.





Artigo 45. Peche provisional

1. As oficinas de farmacia poderán pechar voluntariamente, e de maneira provisional, previa autorización, nos casos determinados regulamentariamente.

O peche voluntario provisional dunha oficina de farmacia soamente poderá autorizarse en caso de que quede garantida a prestación da asistencia farmacéutica, debendo presentarse a solicitude cunha antelación de polo menos un mes, respecto á data no que o peche vaia producirse.

2. Procederase ao peche provisional obrigatorio dunha oficina de farmacia nos seguintes casos:

a) Por incumprimento dos requisitos esixidos por razóns de sanidade, hixiene e seguridade ou pola concorrencia de circunstancias negativas no funcionamento das oficinas de farmacia das que se poidan derivar actuacións susceptibles de prexudicar a saúde da cidadanía.

b) Cando non estivera presente un farmacéutico/a en horario de apertura ao público da oficina de farmacia.

c) Por inhabilitación profesional ou condena a pena privativa de liberdade que supoña ingreso efectivo en prisión impostas á persoa titular da oficina de farmacia por sentenza penal firme, por tempo non superior a dous anos, cando aquela sexa a titular única da oficina de farmacia e non solicitase o nomeamento de substituto/a

d) No caso de imposición, por acordo do Consello da Xunta, da sanción accesoria de peche provisional temporal da oficina de farmacia, de acordo co sinalado no artigo 75.7.

3. Nos casos de peche provisional obrigatorio adoptaranse as medidas necesarias para garantir a atención farmacéutica.

4. O peche provisional dunha oficina de farmacia non poderá exceder de dous anos. Se transcorrido ese prazo persisten as causas que o motivaron procederase á incoación, de oficio, do expediente de peche definitivo da oficina de farmacia.





Artigo 46. *Peche definitivo*

1. O peche definitivo da oficina de farmacia poderá ser voluntario ou obrigatorio.
2. O peche definitivo voluntario dunha oficina de farmacia está suxeito a autorización administrativa.
3. Son causas do peche definitivo obrigatorio das oficinas de farmacia:
 - a) A imposición do mesmo por sentenza xudicial firme.
 - b) A imposición do mesmo por resolución administrativa firme.
 - c) Inhabilitación profesional ou condena a pena privativa de liberdade do/a titular ou cotitulares da oficina de farmacia, mediante sentenza firme ditada nun procedemento penal seguido na súa contra por un delito relacionado directamente coa súa actividade profesional.
 - d) A non transmisión da oficina de farmacia no prazo máximo de duración do réxime de rexencia establecido nos casos de falecemento, incapacidade permanente non parcial, incapacitación xudicial ou declaración xudicial de ausencia da persoa titular ou cotitulares, agás no suposto previsto no artigo 19.2.
 - e) A xubilación total do/a farmacéutico/a titular da oficina de farmacia sen tela transmitido previamente. Neste caso, o procedemento de peche poderá incoarse de oficio ou a instancia de parte, debendo neste caso formularse a solicitude de peche da mesma no prazo máximo de vinte días desde a declaración de xubilación.
 - f) A falta de nomeamento dun/dunha farmacéutico/a rexente nos temos previstos nos artigos 19 e 22.
 - g) A caducidade, perda ou revogación da autorización de instalación da oficina de farmacia.
 - h) O transcurso do prazo de dous anos cando subsistan as causas que deron lugar ao peche provisional da oficina de farmacia.





CAPÍTULO II

As boticas anexas

Artigo 47. *Definición*

1. Enténdese por botica anexa o establecemento sanitario autorizado, no que se presta atención farmacéutica a unha determinada poboación dunha zona farmacéutica debido á concorrencia dalgún dos supostos previstos no artigo seguinte.
2. A botica anexa estará en todo caso vinculada a unha oficina de farmacia. A persoa titular da dita oficina de farmacia será responsable da dirección técnica e está obrigada a administración, subministro e reposición dos medicamentos e produtos sanitarios que se dispensen nela.
3. O/A farmacéutico/a titular da oficina de farmacia a que a botica anexa estea vinculada será responsable da adquisición dos medicamentos e produtos sanitarios, e da vixilancia, control e custodia das receitas dispensadas.
4. A palabra “Botica Anexa” será de utilización exclusiva para estes establecementos, os cales deberán estar tamén sinalizados cunha cruz verde, idéntica á esixida para as oficinas de farmacia.





Artigo 48. *Condicións para a apertura*

1. Nas parroquias e lugares onde non poida instalarse unha oficina de farmacia porque non se cumpran os requisitos esixidos legalmente, e se dean circunstancias de afastamento, difícil comunicación coa oficina de farmacia máis próxima, altas concentracións de poboación temporais ou cando concorran situacións de emerxencia que o fagan aconsellable, poderá autorizarse a apertura dunha botica anexa.
2. Así mesmo, no mapa farmacéutico poderán indicarse aquelas que terán vinculadas unha botica anexa situada nalgunha zona especial de difícil accesibilidade.
3. Tamén poderá autorizarse a apertura dunha botica anexa para prestar a atención farmacéutica naqueles casos nos que o outorgamento dunha autorización de traslado ou a situación de peche dunha oficina de farmacia dificultase o acceso á atención farmacéutica da poboación.
4. Os requisitos para a instalación de boticas anexas, o procedemento de autorización e o réxime de funcionamento e o seu horario mínimo de apertura, así como a súa clausura ou peche regularanse mediante norma regulamentaria.





Artigo 49. *Vinculación da botica anexa*

1. A botica anexa estará vinculada á oficina de farmacia máis próxima entre as existentes no mesma zona farmacéutica. Nos supostos de renuncia ou non aceptación da vinculación por parte da persoa titular ou cotitulares da oficina de farmacia, a botica anexa poderá vincularse con outra oficina de farmacia da mesma zona farmacéutica, podendo ser vinculada no seu defecto ou en caso de non aceptación da vinculación, pola oficina de farmacia máis próxima doutra zona farmacéutica colindante, sempre que a persoa titular ou cotitulares o acepten. Por razóns de interese xeral debidamente xustificadas poderá autorizarse a vinculación da botica anexa tendo en conta outras circunstancias que se determinen regulamentariamente.

2. A botica anexa estará baixo a responsabilidade do/a farmacéutico/a titular da oficina á que se atope vinculada, que asegurará a cobertura da asistencia farmacéutica de acordo coas necesidades para as cales foi establecida, así como da correcta almacenaxe, custodia e conservación dos medicamentos e produtos sanitarios e da vixilancia, control e custodia das receitas dispensadas.

A dispensación de medicamentos será realizada por un farmacéutico/a, coa colaboración, se é o caso, dun/dunha técnico/a ou auxiliar de farmacia.


3. A transmisión dunha oficina de farmacia que teña vinculada unha botica anexa deberá incluír, como requisito inescusable, esta última, sempre e cando se estime absolutamente necesaria.





Artigo 50. *Pече da botica anexa*

1. O peche definitivo dunha oficina de farmacia que teña vinculada unha botica anexa determinará o peche definitivo desta última. Non obstante, se persiste a necesidade da botica anexa, a consellería competente en materia de sanidade vinculará esta á oficina de farmacia máis próxima da mesma zona farmacéutica ou, en caso de non aceptación desta, á oficina de farmacia máis próxima doutra zona farmacéutica.
2. A desaparición das circunstancias que determinaron a apertura dunha botica anexa será causa de peche desta.





CAPÍTULO III

A atención farmacéutica nas estruturas de atención primaria

Artigo 51. Disposicións xerais

De acordo cos artigos 3.6 e 83 do texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, de 24 de xullo, no nivel de atención primaria prestarase, polas unidades de farmacia dos centros de atención primaria, a atención farmacéutica necesaria para que o equipo multidisciplinario de atención á saúde dispoña dos medios terapéuticos necesarios para a súa aplicación dentro das ditas institucións e para a custodia, conservación e dispensación dos medicamentos que esixan unha particular vixilancia, supervisión e control do equipo multidisciplinario de atención á saúde.





Artigo 52. Condicións e requisitos

1. Estableceranse regulamentariamente os requisitos para a creación e o funcionamento das unidades de farmacia previstas no artigo anterior, así como os recursos humanos, materiais e técnicos con que terán que contar.
2. Deberán constituírse depósitos de medicamentos nos centros do sistema sanitario público de atención primaria para o seu uso interno, baixo a responsabilidade dun servizo de farmacia hospitalario ou dunha unidade de farmacia dun centro de atención primaria, debendo quedar aqueles baixo a supervisión dun/dunha farmacéutico/a, que contará coa asistencia do persoal técnico, se é o caso, e demais persoal que precise, segundo o volume de actividade asistencial.





Artigo 53. Funcións das unidades de farmacia de atención primaria

1. Son funcións das unidades de farmacia de atención primaria:

- a) Garantir e asumir a responsabilidade técnica da adquisición, calidade, correcta conservación, cobertura das necesidades, custodia, preparación de fórmulas maxistrais ou preparados oficinais e dispensación dos medicamentos para ser aplicados dentro dos centros de atención primaria e de aqueles para os que se esixa unha particular vixilancia, supervisión e control, segundo se establece no artigo 103 da Lei 14/1986, de 25 de abril, xeral de sanidade, e nas disposicións regulamentarias que o desenvolven.
- b) Establecer un sistema eficaz e seguro de distribución de medicamentos e produtos sanitarios nos centros e estruturas ao seu cargo.
- c) Colaborar no establecemento de sistemas de información sobre xestión de farmacoterapia a partir de estratexias que inclúan aspectos clínicos, de efectividade, seguridade e eficiencia da utilización dos medicamentos e proporcionar unha correcta información e formación sobre medicamentos e produtos sanitarios aos profesionais sanitarios.
- d) Desenvolver protocolos e guías farmacoterapéuticas que garantan a correcta asistencia farmacoterapéutica aos/ás pacientes, en especial o referente á selección de medicamentos e á continuidade dos tratamentos e sistemas de apoio á toma de decisións clínicas en farmacoterapia.
- e) Revisar a medicación na/as persoas usuarias do seu ámbito, para detectar ou prever eventos adversos, garantir a adecuación terapéutica e mellorar a adherencia ao tratamento, e contribuír, como parte do equipo multidisciplinar, a que a/as persoas usuarias, obteña/n o mellor resultado en saúde derivado de la utilización de medicamentos.
- f) Establecer un sistema de seguimento farmacoterapéutico da/as persoas usuarias que contribúa a garantir a adherencia e persistencia terapéutico e nos programas de conciliación da medicación, impulsando a coordinación farmacoterapéutica entre diferentes estruturas sanitarias e niveles asistenciais, así como a integración e continuidade asistencial.
- g) Realizar a homologación sanitaria dos tratamentos prescritos.
- h) Colaborar na avaliación de resultados en saúde derivado da utilización dos medicamentos na práctica clínica real, da incorporación da innovación terapéutica e tecnolóxica e das políticas sanitarias.





- i) Participar en proxectos e comités de investigación e promover unha investigación clínica en farmacoterapia de calidade e adecuada ás necesidades dos/as pacientes, garantindo a correcta custodia e dispensación dos produtos en fase de investigación clínica.
 - j) Formar parte das comisións relativas ao uso racional do medicamento ou de outros produtos farmacéuticos, en especial a Comisión Autonómica Central de Farmacia e Terapéutica.
 - k) Impulsar a coordinación e traballo en equipo e colaboración cos hospitais e servizos de atención especializada, coa finalidade de asegurar a calidade da prestación farmacéutica mediante o seguimento dos tratamentos prescritos polo médico.
 - l) Establecer programas que potencien un uso seguro dos medicamentos.
 - m) Impulsar e participar en programas de educación da poboación sobre medicamentos, o seu emprego racional e a prevención do seu abuso.
 - n) Promover a notificación de incidentes relacionados co uso de medicamentos a través dos sistemas de notificación existentes.
 - o) Realizar cantas funcións poidan redundar nun mellor uso e control dos medicamentos, mediante estratexias de colaboración entre os equipos de atención primaria, os/as profesionais sanitarios/as dos distintos niveis asistenciais e calquera outras que se establezan na normativa que lles resulten aplicable.
2. Todo o anterior será así mesmo de aplicación para os produtos sanitarios, agás naqueles supostos onde resulte imposible a súa aplicación pola propia natureza do produto.
3. As ditas funcións serán realizadas baixo a responsabilidade dun/dunha farmacéutico/a, que contará con medios materiais e persoais suficientes para o seu desenvolvemento.





XUNTA DE GALICIA

TÍTULO III

A atención farmacéutica nos hospitais, centros de asistencia social e outros centros, servizos e establecementos sanitarios

Artigo 54. Atención farmacéutica nos hospitais e centros de asistencia social

A atención farmacéutica nos hospitais e nos centros de asistencia social levarase a cabo a través dos servizos de farmacia hospitalaria propios e dos depósitos de medicamentos e produtos sanitarios. Neles, os/as farmacéuticos/as responsables desenvolverán as funcións previstas nesta lei, prestando un servizo integrado con outras actividades da atención hospitalaria ou sociosanitaria.





Artigo 55. Servizos de farmacia hospitalaria propios dos hospitais e centros de asistencia social

Será obrigatorio o establecemento dun servizo de farmacia hospitalaria propio en:

- a) Todos os hospitais que teñan cen ou máis camas.
- b) Os centros de asistencia social con cen ou máis camas en réxime de asistidos.

Malia o anterior, a consellería competente en materia de prestación farmacéutica poderá establecer acordos ou convenios cos centros mencionados nas letras a) e b) eximíndolles da dita esixencia, sempre e cando dispoñan dun depósito de medicamentos e produtos sanitarios vinculado ao servizo de farmacia do hospital da rede pública que sexa o de referencia na área sanitaria correspondente.





Artigo 56. Funcións dos servizos de farmacia hospitalaria propios dos hospitais e dos centros de asistencia social

Os servizos de farmacia hospitalaria propios dos hospitais e dos centros de asistencia social terán, ademais das funcións previstas na normativa estatal aplicable, as seguintes::

- a) Participar, a través da comisión de farmacia e terapéutica do centro, no proceso multidisciplinario da selección de medicamentos e produtos sanitarios precisos para a correcta atención farmacéutica, baixo criterios de seguridade, calidade e custo/efectividade, recollidos na guía farmacoterapéutica de obrigada difusión, que deberá actualizarse periodicamente.
- b) Garantir e asumir a responsabilidade técnica da adquisición, calidade, correcta conservación, cobertura das necesidades, custodia, preparación de fórmulas maxistrais ou preparados oficinais e dispensación dos medicamentos precisos para as actividades intrahospitalarias e daqueles outros para tratamentos extrahospitalarios, conforme ao establecido no artigo 3.6. do texto refundido da Lei de garantías e uso racional dos medicamentos e produtos sanitarios, aprobado polo Real decreto legislativo 1/2015, de 24 de xullo.
- c) Establecer un sistema eficaz e seguro de distribución de medicamentos, tomar as medidas para garantir a súa correcta conservación, dispoñibilidade, preparación, administración, trazabilidade e reposición, custodiar e dispensar os produtos en fase de investigación clínica e velar polo cumprimento da lexislación sobre medicamentos de sustancias psicoactivas ou de calquera outro medicamento que requira un control especial.
- d) Establecer un sistema de dispensación de todos aqueles medicamentos contemplados no artigo 3.6.b) e c) do Real Decreto Legislativo 1/2015, do 24 de xullo, que favoreza a atención farmacéutica individualizada e que permita detectar ou prever eventos adversos, garantir a adecuación terapéutica e mellorar a adherencia ao tratamento, e que contribúa a que a/as persoas usuarias obteña/n o mellor resultado en saúde derivado de la utilización de medicamentos e que permita adaptarse ás novas necesidades asistenciais e os avances das tecnoloxías da información e comunicación.
- e) Participar no seguimento farmacoterapéutico da/as persoas usuarias que contribúa a garantir a adherencia e persistencia terapéutico e nos programas de conciliación da medicación, impulsando a coordinación farmacoterapéutica entre





diferentes estruturas sanitarias e niveles asistenciais, así como a integración e continuidade asistencial.

f) Formar parte das comisións das correspondentes estruturas sanitarias en que poidan ser útiles os seus coñecementos para a selección e avaliación científica dos medicamentos e os criterios de uso, así como formar parte e coordinarse e colaborar coa Comisión Autonómica Central de Farmacia e Terapéutica.

g) Participar no desenvolvemento, implantación, e no seguimento de protocolos terapéuticos e da guía farmacoterapéutica co fin de conseguir a farmacoterapia máis segura e eficiente, en condicións de equidade e homoxeneidade e de promover o uso racional do medicamento no hospital e na súa área de influencia.

h) Realizar a homologación sanitaria dos tratamentos prescritos.

i) Colaborar na avaliación de resultados en saúde derivado da utilización dos medicamentos na práctica clínica real, da incorporación da innovación terapéutica e tecnolóxica e as políticas sanitarias.

j) Establecer un servizo de información de medicamentos para todo o persoal do hospital, estudos sistemáticos de utilización de medicamentos e actividades de farmacocinética clínica e todas aquelas actividades da súa competencia que redunden no mellor coidado, axuste posolóxico, terapias de soporte e estado nutricional da/as persoas usuarias.

k) Colaborar na formación pre e posgraduada de profesionais sanitarios/as.

l) Efectuar traballos de investigación propios ou en colaboración con outras unidades ou servizos e participar nos ensaios clínicos con medicamentos.

m) Colaborar coas estruturas de atención primaria e atención hospitalaria da súa área de influencia no desenvolvemento das súas funcións co fin de garantir unha farmacoterapia integrada e unha continuidade asistencial.

n) Colaborar nos programas que se establezan na súa área sobre o uso racional e seguro do medicamento, así como en programas de formación da/as persoas usuarias/coidadores sobre o uso dos medicamentos e a súa participación activa nos tratamentos.

ñ) Establecer un sistema de farmacovixilancia intrahospitalario e promover a notificación de incidentes relacionados co uso de medicamentos a través dos sistemas de notificación existentes.

o) Participar e coordinar a xestión das compras de medicamentos e produtos sanitarios das estruturas organizativas de xestión Integrada a efectos de asegurar a eficiencia da mesma.





XUNTA DE GALICIA

p) Realizar cantas funcións podan redundar nun mellor uso e control dos medicamentos mediante estratexias de colaboración entre os/as profesionais sanitarios/as dos distintos niveis asistenciais e calquera outras que se establezan.

CSV: AYPH2tcu12
Verificación:
<https://sede.parlamentodegalicia.gal/tramites/csv/>





Artigo 57. Recursos materiais e humanos dos servizos de farmacia hospitalaria propios

1. Os servizos de farmacia hospitalaria propios deberán dispoñer dunha superficie adecuada en relación coa actividade desenvolvida.
2. Os servizos de farmacia hospitalaria propios dos hospitais contarán cunha área diferenciada de atención da/as persoas usuarias externas, para preservar a confidencialidade e privacidade.
3. Os servizos de farmacia hospitalaria propios dos hospitais e dos centros de asistencia social estarán baixo a titularidade e responsabilidade dun/dunha farmacéutico/a especialista en farmacia hospitalaria.
4. Dependendo do volume, das actividades e do tipo de centro, fixarase por norma regulamentaria o número de farmacéuticos/as adicionais, de técnicos ou auxiliares en farmacia e de persoal administrativo e subalterno necesarios para desenvolver con normalidade o funcionamento do servizo.
5. Todos os/as farmacéuticos/as que exerzan a súa actividade nos servizos de farmacia hospitalaria propios estarán en posesión do título de especialista en farmacia hospitalaria.





Artigo 58. *Depósitos de medicamentos e produtos sanitarios*

1. Os hospitais e os centros de asistencia social que presten asistencia sanitaria específica que non contén cun servizo de farmacia hospitalario propio e que non estean obrigados a telo, deberán dispoñer dun depósito, que estará vinculado a un servizo de farmacia hospitalaria do distrito sanitario e baixo a responsabilidade da persoa que exerza a xefatura do dito servizo, no caso dos hospitais ou dos centros de asistencia social do sector público. No suposto de que se trate dun hospital ou centro de asistencia social do sector privado, o depósito estará vinculado a unha oficina de farmacia establecida na mesma zona farmacéutica ou a un servizo de farmacia hospitalario.

Os hospitais e centros de asistencia social cos que se formalicen os acordos ou convenios aos que se refire o artigo 55 deberán dispoñer dun depósito de medicamentos vinculado ao servizo de farmacia hospitalaria do hospital da rede pública que sexa o de referencia na área sanitaria correspondente.

2. Os centros e servizos sanitarios nos que polo elevado volume de medicamentos utilizado ou polas características farmacolóxicas dos mesmos ou ben por motivos de saúde pública se estime necesario que deben dispor dun depósito serán determinados regulamentariamente. Asemade poderá autorizarse a existencia de depósitos noutros centros e establecementos sanitarios onde se leven a cabo tratamentos específicos para determinados tipos de usuarios/as, cando as características dos tratamentos ou as necesidades asistenciais así o esixan.

En todo caso, os citados depósitos deberán estar vinculados a algún dos establecementos ou servizos enumerados no artigo 3.6 do texto refundido da Lei de garantías e uso racional dos medicamentos e produtos sanitarios, aprobada polo Real decreto lexislativo 1/2015, do 24 de xullo, aos cales corresponderá a custodia, conservación e dispensación de medicamentos de uso humano.

3. O depósito, dependendo da súa vinculación, será atendido por un/unha farmacéutico/a do servizo de farmacia do distrito sanitario, no seu caso, por un/unha farmacéutico/a do servizo de farmacia hospitalaria do hospital da rede pública que sexa o de referencia na área sanitaria correspondente para os hospitais e centros de asistencia social que formalicen acordos ou convenios de conformidade con disposto no número 1, ou polo/a farmacéutico/a titular da oficina de farmacia coa que o centro estea vinculado.





4. O/A farmacéutico/a responsable do depósito, coa colaboración do persoal técnico ou auxiliar de farmacia necesario, realizará as funcións seguintes:

- a) Garantir a correcta conservación, custodia e dispensación de medicamentos e produtos sanitarios para a súa aplicación dentro do centro, establecemento ou servizo.
- b) Asegurar un sistema eficaz e seguro de dispensación de medicamentos e produtos sanitarios no centro, establecemento ou servizo, coa implantación de medidas que contribúan a garantir a súa correcta administración.
- c) Establecer as normas de acceso ao depósito para o persoal previamente autorizado, que será aquel que determine o servizo de farmacia responsable do depósito.
- d) Informar o persoal sanitario do centro, establecemento ou servizo e os/as propios/as pacientes en materia de medicamentos, así como realizar estudos de utilización de medicamentos.
- e) Colaborar coa comisión de farmacia e terapéutica do centro e cos comités éticos de investigación clínica, así como con outras comisións do centro hospitalario de referencia nas que os seus coñecementos poidan ser útiles.
- f) Garantir as existencias necesarias para que a dispensación de medicamentos quede cuberta as vinte e catro horas do día.

5. Os depósitos deberán dispor dunha superficie adecuada en relación coa actividade desenvolvida e deberán contar co persoal necesario para poder levar a cabo as súas funcións.





TÍTULO IV

Distribución de medicamentos de uso humano e de produtos sanitarios

Artigo 59. *Entidades de distribución*

1. Conforme ao disposto no artigo 67.1 do texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, de 24 de xullo, a distribución dos medicamentos autorizados realizarase a través das entidades de distribución ou directamente polo laboratorio titular da autorización de comercialización destes.
2. As entidades de distribución e, no seu caso, os laboratorios farmacéuticos que distribúan directamente os seus produtos disporán do persoal e dos locais, instalacións e equipos adecuados e suficientes para garantir a correcta conservación e distribución dos medicamentos. As entidades cumprirán os requisitos, as condicións e as obrigas establecidos na normativa vixente e nas normas de boas prácticas de distribución de medicamentos de uso humano.
3. A distribución dos produtos sanitarios se efectuará a través de establecementos que garantan o adecuado almacenamento e conservación dos produtos. Os distribuidores de produtos sanitarios contarán coa organización e medios precisos de conformidade coa normativa específica destes produtos.
4. As entidades de distribución autorizadas pola Administración autonómica non poderán arrendar, subarrendar ou ceder a terceiras persoas os locais ou instalacións destinados ao desenvolvemento das súas actividades.





Artigo 60. Autorización das entidades de distribución de medicamentos de uso humano

1. De conformidade coa normativa básica estatal, as entidades de distribución de medicamentos de uso humano están sometidas a autorización previa ao seu funcionamento.
2. De acordo co artigo 20.4 do Real Decreto 782/2013, do 11 de outubro, sobre distribución de medicamentos de uso humano, as entidades de distribución deberán dispoñer para o seu funcionamento, ademais da preceptiva autorización, dun certificado de cumprimento de boas prácticas de distribución en vigor emitido segundo o establecido no artigo 21 do dito real decreto.
3. En relación cos almacéns maioristas e almacéns por contrato domiciliados no territorio da Comunidade Autónoma de Galicia, corresponden á Administración autonómica a competencia para a tramitación e resolución dos procedementos relativos á autorización previa ao seu funcionamento así como as autorizacións de modificacións relevantes que afecten aos locais, equipamentos e actividades, de modificación das condicións autorizadas, de -traslado a outras instalacións e de cesamento da súa actividade. Os ditos procedementos de autorización serán regulados a través de norma regulamentaria.
4. Os almacéns maioristas e almacéns por contrato que non estean domiciliados no territorio da Comunidade Autónoma de Galicia, pero que desenvolvan nela a súa actividade, están suxeitos á obriga de comunicación prevista no artigo 68.1 do texto refundido da Lei de garantías e uso racional dos medicamentos e produtos sanitarios, aprobado polo Real decreto legislativo 1/2015, de 24 de xullo.
5. Os cambios de titularidade das entidades de distribución de medicamentos de uso humano cuxa autorización sexa competencia autonómica serán comunicados mediante o procedemento que a tal efecto se determine.
6. Asemade, aquelas entidades que ademais de medicamentos distribúan produtos sanitarios, deberán realizar unha previa comunicación de inicio de actividade nos termos previstos na normativa específica que resulte de aplicación aos ditos produtos. A modificación de datos e cese de actividade tamén deberá ser comunicada.





Artigo 61. Dirección técnica e persoal adicional das entidades de distribución de medicamentos de uso humano

1. De conformidade co artigo 70 do texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, de 24 de xullo, as entidades de distribución de medicamentos autorizadas disporán dun/dunha director/a técnico/a farmacéutico/a, cuxo cargo será incompatible con actividades de carácter sanitario que supoñan intereses directos coa fabricación ou dispensación de medicamentos ou que vaian en detrimento do adecuado cumprimento das súas funcións, e que deberá cumprir os requisitos previstos no artigo 6 do Real decreto 782/2013, do 11 de outubro.
2. De acordo co artigo 7 do Real decreto 782/2013, do 11 de outubro, o/a director/a técnico/a farmacéutico/a deberá realizar as súas funcións para garantir a aplicación e cumprimento das boas prácticas de distribución establecidas na Unión Europea así como da normativa vixente que sexa de aplicación. As ditas funcións inclúen as previstas no dito precepto.
3. Conforme ao artigo 5 do Real decreto 782/2013, do 11 de outubro, poderán nomearse un ou máis directores técnicos/as farmacéuticos/as suplentes, cos mesmos requisitos que o/a titular, ao/á que substituirán na súa ausencia.
4. Correspóndelle á consellería competente en materia de sanidade, previa comprobación do cumprimento dos requisitos aplicables, a aceptación do nomeamento dos/das directores/as técnicos/as farmacéuticos/as das entidades de distribución de medicamentos de competencia autonómica e dos/as seus/súas suplentes.
5. Ademais da dirección técnica, as entidades de distribución de medicamentos deberán dispoñer do persoal adicional necesario para garantir a calidade e seguridade nas actividades de distribución incluídas no ámbito da autorización, nos termos previstos na normativa aplicable.





XUNTA DE GALICIA

TITULO V Unidades de radiofarmacia

Artigo 62. *Disposicións xerais*

Os medicamentos radiofármacos de uso humano e as funcións que respecto deles correspondan ás unidades de radiofármacos axustaranse á normativa a eles aplicable.





Artigo 63. Clasificación das unidades de radiofarmacia

As unidades de radiofarmacia poderán ser de dous tipos:

- a) Unidades de radiofarmacia de tipo I, que realizarán as funcións previstas nos números 3 e 4 do artigo 48 do texto refundido da Lei de garantías e uso racional dos medicamentos e produtos sanitarios, aprobado polo Real decreto legislativo 1/2015, de 24 de xullo, nos termos e condicións previstos na normativa aplicable.
- b) Unidades de radiofarmacia de tipo II, que son aquelas que poden estar instaladas en locais independentes dos servizos ou centros asistenciais e realizarán as funcións previstas nos números 3 , 4 e 5 do artigo 48 do texto refundido da Lei de garantías e uso racional dos medicamentos e produtos sanitarios, aprobado polo Real decreto legislativo 1/2015, de 24 de xullo, nos termos e condicións previstos na normativa aplicable.





Artigo 64. *Autorizacións*

A autorización para a apertura, modificación e peche das unidades de radiofarmacia corresponde á consellería competente en materia de sanidade; que establecerá regulamentariamente os procedementos oportunos, podendo así mesmo establecer os controis e inspeccións que considere necesarios para o seu correcto funcionamento. Todo isto, sen prexuízo das competencias que correspondan a outros organismos segundo a normativa aplicable.





Artigo 65. *Recursos humanos*

1. A persoa responsable da unidade de radiofarmacia debe ser un/unha facultativo/a especialista en radiofarmacia. En función do tipo e volume da actividade de preparación de radiofármacos desenvolvida pola unidade, poderá ser necesaria a presenza de facultativos/as especialistas en radiofarmacia adicionais. En todo caso, para o funcionamento da unidade requírese a presenza dun/dunha facultativo/a especialista en radiofarmacia.

2. A persoa responsable da unidade de radiofarmacia levará a cabo as seguintes funcións:


a) Asegurar que a adquisición, conservación, preparación, control de calidade, documentación e dispensación dos radiofármacos se realiza de acordo coa lexislación aplicable na materia.

b) Establecer as instrucións específicas de preparación e control dos radiofármacos, de acordo coa normativa aplicable.

c) Comprobar o correcto mantemento dos locais e equipos utilizados na preparación, control e conservación dos radiofármacos.

d) Garantir a calidade dos radiofármacos preparados e conservar o resultado dos controis e verificacións realizadas.

3. A unidade de radiofarmacia contará ademais co persoal técnico, con formación en preparación e control de radiofármacos así como en protección radiolóxica, en número suficiente para desenvolver a súa actividade de forma adecuada. Todo o persoal facultativo e técnico deberá estar capacitado de conformidade cos requisitos esixidos pola lexislación aplicables en materia de seguridade de instalacións radioactivas e pola restante normativa de aplicación.





Artigo 66. *Adquisición e dispensación*

A adquisición e dispensación de radiofármacos elaborados nas unidades de radiofarmacia non integradas en servizos de farmacia é responsabilidade do servizo de farmacia do centro onde se vaian utilizar.

[Handwritten signature]





TÍTULO VI

A distribución e dispensación de medicamentos veterinarios

Artigo 67. *Distribución e dispensación de medicamentos veterinarios*

1. A distribución e dispensación de medicamentos veterinarios levarase a cabo nos establecementos e servizos e nas condicións que se prevén no artigo 38 do texto refundido da Lei de garantías e uso racional dos medicamentos e produtos sanitarios, aprobado polo Real Decreto Lexislativo 1/2015, de 24 de xullo, e na restante normativa estatal de aplicación, e conforme ao disposto na presente lei e na normativa regulamentaria autonómica de desenvolvemento.

2. A dispensación ao público dos medicamentos veterinarios realizarase exclusivamente por:

a) As oficinas de farmacia legalmente establecidas, que ademais serán as únicas autorizadas para a elaboración e dispensación de fórmulas maxistrais e preparados oficinais.

b) As entidades ou agrupacións gandeiras autorizadas, sempre que contén cun servizo farmacéutico responsable da custodia, conservación e dispensación destes medicamentos, para o uso exclusivo dos seus membros.

c) Os establecementos comerciais detallistas autorizados, sempre que contén cun servizo farmacéutico responsable da custodia, conservación e dispensación destes medicamentos.

d) As boticas de urxencia de medicamentos veterinarios que, por razóns de urxencia e afastamento poidan autorizarse, cando non exista nun municipio oficina de farmacia nin outro centro de subministro de medicamentos veterinarios autorizado. Estas boticas poderán estar vinculadas a unha oficina de farmacia, nos termos previstos no artigo 49, ou a calquera outro establecemento ou servizo de dispensación de medicamentos veterinarios autorizado. Neste caso, a dispensación realizarase nos termos establecidos na normativa estatal.

Asemade, os medicamentos destinados a cans, gatos, animais de terrario, paxaros domiciliarios, peixes de acuario e pequenos roedores que non requiran prescrición veterinaria poderán distribuírse e venderse noutros establecementos,





nos termos previstos na normativa básica estatal e na que, con respecto desta, se dite pola Comunidade Autónoma.

3. As entidades ou agrupacións gandeiras haberán de contar cun número de farmacéuticos, técnicos ~~ou~~ e auxiliares axeitado ao número de centros de dispensación de medicamentos, nas condicións que regulamentariamente se establezan, así como con programas zoosanitarios aprobados polo órgano competente da Comunidade Autónoma.

4. Os establecementos comerciais detallistas autorizados+ haberán de contar con servizos farmacéuticos, que serán responsables da custodia, subministro e control de utilización dos medicamentos veterinarios. Estes centros dispensadores e os do apartado anterior deberán estar identificados coa lenda "Produtos zoosanitarios".

5. A dispoñibilidade de medicamentos veterinarios polo/s profesionais da veterinaria para o exercicio da súa actividade profesional rexerase pola normativa básica estatal e polas normas que, en desenvolvemento de tales bases, se ditén pola Comunidade Autónoma.

6. O outorgamento das autorizacións de competencia autonómica relativas aos establecementos e servizos de distribución e dispensación exclusiva de medicamentos veterinarios requirirán autorización previa da consellería competente en materia de gandería, previo informe da consellería competente en materia de sanidade.

A autorización das oficinas de farmacia nas que se dispensen medicamentos veterinarios corresponde á consellería competente en materia de sanidade conforme ao réxime xeral aplicable a tales autorizacións.

Os centros que distribúan medicamentos tanto de uso humano como de uso veterinario serán autorizados pola consellería competente en materia de sanidade, previo informe da consellería competente en materia de gandería.





TÍTULO VII

Os/As profesionais farmacéuticos e outro persoal dos establecementos e servizos de atención farmacéutica

Artigo 68. Definición de profesional farmacéutico

Aos efectos desta lei enténdese por profesionais farmacéuticos todas aquelas persoas que, posuíndo a titulación correspondente, desenvolvan as súas funcións nos establecementos e servizos de atención farmacéutica regulados nesta lei.





Artigo 69. *Formación continuada*

1. A consellería competente en materia de sanidade, en colaboración coas universidades, os colexios oficiais de farmacéuticos, sociedades científicas e outras organizacións profesionais, contribuirá a impulsar a formación continuada dos profesionais farmacéuticos e do persoal auxiliar dos establecementos e servizos de atención farmacéutica coa finalidade de ofrecer unha prestación útil e eficiente á cidadanía a través da actualización dos seus coñecementos.
2. Os colexios oficiais de farmacéuticos, as sociedades científicas e as organizacións profesionais, promoverán e desenvolverán actividades de formación continuada para contribuír á necesaria actualización do coñecemento e das habilidades profesionais do persoal que participa nas actividades de atención farmacéutica.
3. As persoas responsables dos establecementos e servizos de atención farmacéutica facilitarán o acceso do persoal ao seu cargo á formación continuada.





Artigo 70. *Incompatibilidades*

1. Con carácter xeral, a titularidade dunha oficina de farmacia e o exercicio profesional farmacéutico nos establecementos e servizos de atención farmacéutica é incompatible coa existencia de calquera clase de interese s económicos, directos, na fabricación e distribución de medicamentos ou de produtos sanitarios, coas excepcións previstas na disposición transitoria segunda do texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, do 24 de xullo.

2. Ademais das incompatibilidades do réxime xeral, o exercicio profesional do/da farmacéutico/a nun establecemento ou servizo de atención farmacéutica regulados nesta lei, é incompatible con:

a) O exercicio profesional en calquera outro dos establecementos e servizos de atención farmacéutica regulados nesta lei, coa excepción de boticas anexas e depósitos de medicamentos vinculados ao establecemento ou servizo no que se desenvolve a actividade profesional. Esta incompatibilidade non resultará de aplicación no caso de farmacéuticos/as adxuntos/as de oficina de farmacia contratados a tempo parcial, que poderán desenvolver a súa actividade profesional en oficinas de farmacia diferentes, sempre que exista compatibilidade entre os horarios de traballo.

b) O exercicio clínico da medicina, odontoloxía, enfermería, fisioterapia, podoloxía, veterinaria ou calquera outra actividade profesional que no futuro puidera ser habilitada para a prescrición ou indicación de dispensación de medicamentos.

c) O exercicio profesional nos establecementos autorizados para distribuír ou dispensar medicamentos veterinarios (almacéns o maior, entidades ou agrupacións gandeiras e establecementos comerciais polo miúdo).

d) O exercicio profesional nos laboratorios de fabricación de medicamentos de uso humano ou veterinario.


3. En particular, o exercicio profesional do/a farmacéutico/a na oficina de farmacia, sexa como farmacéutico/a titular, cotitular, rexente, substituto/a ou adxunto/a, será incompatible con:

a) Calquera actividade profesional ou mercantil que impida a presenza física do farmacéutico durante o horario de atención ao público da oficina de farmacia.





- b) A prestación de servizos retribuídos en calquera administración pública en función de relación laboral, funcionarial ou estatutaria. Esta incompatibilidade non resultará de aplicación no caso de farmacéuticos exercentes en oficinas de farmacia que teñan a condición de titores de prácticas tuteladas, e naqueles outros supostos nos que a compatibilidade veña recoñecida pola normativa aplicable.
- c) O exercicio profesional como visitador médico, representante ou comisionista de entidades de fabricación ou distribución de medicamentos, ou de produtos sanitarios ou de produtos do canal farmacéutico.





TÍTULO VIII

Publicidade, promoción e información dos medicamentos e produtos sanitarios

Artigo 71. Garantías na información, promoción e publicidade de medicamentos e produtos sanitarios

1. A consellería competente en materia de sanidade adoptará as medidas oportunas para garantir que a información, a promoción e a publicidade dos medicamentos e produtos sanitarios, destinadas ás/aos profesionais da saúde ou á poboación en xeral, se axusten a criterios de veracidade, evitando inducir a unha utilización incorrecta ou a un sobre consumo.
2. Así mesmo, correspóndelle á dita consellería o control de calquera publicidade de medicamentos e produtos sanitarios que se difunda especificamente no ámbito da Comunidade Autónoma de Galicia, de conformidade co procedemento que se determine regulamentariamente.
3. Coidará ademais de que a información e a promoción dirixida a profesionais sanitarios no territorio da Comunidade Autónoma de Galicia estea de acordo coa información técnica e científica autorizada pola Axencia Española de Medicamentos e Produtos Sanitarios, e deberá ser rigorosa, ben fundada e obxectiva e non inducir a erro, de acordo coa lexislación vixente, e axustarse á ficha técnica.
4. Tamén terá acceso, para efectos de inspección, a tódolos medios de información, de promoción e publicidade de medicamentos e produtos sanitarios, dirixidos aos profesionais sanitarios ou á poboación en xeral, xa sexan escritos, audiovisuais, informáticos ou de calquera outra natureza.
5. No caso das mensaxes publicitarias difundidas no ámbito da Comunidade Autónoma de Galicia, as entidades responsables das mesmas deberán comunicar a súa intención de realizar esta actividade de acordo co procedemento establecido.





TÍTULO IX Réxime sancionador

Artigo 72. Disposicións xerais

1. As infraccións recollidas nesta lei serán obxecto das correspondentes sancións administrativas, logo da instrución do oportuno expediente, sen prexuízo das responsabilidades civís, penais ou doutra orde que poidan concorrer.

2. As infraccións contempladas na presente lei o son sen prexuízo do disposto no texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, do 24 de xullo, na Lei 8/2003, do 24 de abril, de sanidade animal, respecto dos establecementos de dispensación de medicamentos veterinarios, agrupacións de gandeiros con programa sanitario e distribuidores de medicamentos veterinarios, e na normativa de desenvolvemento deste.


No exercicio da potestade sancionadora autonómica en relación co réxime sancionador contido no dito texto refundido será aplicable o prazo máximo para resolver previsto no artigo 78, salvo que a normativa específica reguladora estableza un prazo distinto.





Artigo 73. Acción inspectora

1. Corresponde á consellería competente en materia de sanidade, a través da inspección sanitaria, a realización das inspeccións que se consideren necesarias para verificar o cumprimento do establecido nesta lei e na normativa estatal en materia de medicamentos e produtos sanitarios nos termos e co alcance previstos nela, sen prexuízo das atribucións dos servizos veterinarios oficiais da consellería competente en materia de gandería en relación coas inspeccións dos establecementos de dispensación de medicamentos veterinarios, agrupacións gandeiras con programa sanitario e entidades de distribución de medicamentos veterinarios, as boticas anexas de urxencia, ou respecto a venda a distancia ao público ou por outros canles de medicamentos non suxeitos a prescrición veterinaria.
2. O persoal da consellería competente en materia de sanidade, así como o persoal da consellería competente en materia de gandería que desenvolva as funcións de inspección, terá a consideración de autoridade sanitaria, de conformidade co establecido na Lei 8/2008, do 10 de xullo, de saúde de Galicia.





Artigo 74. *Infraccións*

1. Constituirán infraccións administrativas, e serán sancionadas nos termos previstos no artigo seguinte, as condutas que a continuación se determinan.
2. As infraccións se cualifican como leves, graves ou moi graves atendendo aos criterios de risco para a saúde, contía do eventual beneficio, gravidade da alteración sanitaria ou social producida, xeneralización de infracción e reincidencia.
3. Teñen a consideración de infraccións leves as seguintes:
 - a) Non ir provisto o persoal que presta servizos na oficina de farmacia do distintivo que o identifique.
 - b) O incumprimento do horario ampliado voluntario da oficina de farmacia comunicado á administración autonómica.
 - c) O incumprimento das obriga de información sobre as oficinas de farmacia en servizo de garda previstas no artigo 27.7.
 - d) Entregar regalos ou obsequios que non teñan a condición de mostras e cun prezo de venda ao público non superior a 15 euros, como cortesía e non como método vinculado á promoción e venda ao público de medicamentos e produtos sanitarios.
 - e) A lesión dos dereitos da cidadanía previstos no artigo 8.1 sempre que non exista prexuízo asistencial para a persoa interesada.
 - f) Os incumprimentos das obrigas impostas á cidadanía no artigo 8.2 respecto ao persoal e ás instalacións dos establecementos e servizos de atención farmacéutica.
 - g) O incumprimento das obrigas previstas nesta lei en relación coa sinalización e publicidade das oficinas de farmacia.
 - h) Utilizar as diferentes zonas coas que debe contar unha oficina de farmacia para actividades diferentes ás correspondentes a cada unha delas.
 - i) Cumprimentar incorrectamente o libro de estupefacientes e o libro receitario, en tanto que os libros de rexistro de carácter sanitario de tenencia obrigatoria.
4. Teñen a consideración de infraccións graves as seguintes:
 - a) O funcionamento dunha unidade de radiofarmacia sen a presenza do persoal exixido en cada caso, distinto do facultativo/a especialista en radiofarmacia.





- b) Incumprir o/a facultativo/a especialista en radiofarmacia responsable dunha unidade de radiofarmacia as funcións atribuídas nesta lei que competan ao-seu posto.
- c) O incumprimento do horario mínimo obrigatorio establecido para as oficinas de farmacia, así como dos servizos de garda.
- d) Carecer do libro de estupefacientes e do libro receitario, en tanto que libros de rexistro de carácter sanitario de tenencia obligatoria.
- f) O exercicio ou desenvolvemento de actividades mercantís ou comerciais nas dependencias da oficina de farmacia distintas das vinculadas á súa autorización de instalación.
- g) Dispensar medicamentos ou produtos sanitarios a un/unha mesmo/a paciente sen atender ás pautas de uso racional dos mesmos contempladas na ficha técnica.
- h) Non contar na oficina de farmacia cun/cunha farmacéutico/a adxunto/a cando sexa obrigatorio, consonte co previsto no artigo 21.2.
- i) O incumprimento polas oficinas de farmacia das esixencias e procedementos para a dispensación e/ou facturación das receitas oficiais establecidos polos concertos subscritos pola consellería competente en materia de sanidade e polo Servizo Galego de Saúde para a execución da prestación farmacéutica, sen prexuízo das infraccións previstas nos artigos 111 e 112 do texto refundido da Lei de garantías e uso racional dos medicamentos e produtos sanitarios, aprobado polo Real decreto lexislativo 1/2015, do 24 de xullo.
- j) Realizar calquera tipo de publicidade ou actividade promocional da oficina de farmacia, organizar eventos ou actividades e utilizar ferramentas que poidan implicar unha promoción da oficina de farmacia.
- k) O incumprimento por parte do/da titular ou cotitulares da oficina de farmacia de calquera das condicións consonte as cales se outorgou a autorización de instalación.
- l) A lesión dos dereitos da cidadanía previstos no artigo 8.1 sempre que exista prexuízo asistencial para a persoa interesada.
- m) A comisión dunha infracción leve cando, no período dun ano, o mesmo suxeito fose sancionado pola comisión dunha ou máis infraccións leves e as resolucións sancionadoras fosen firmes na vía administrativa.
- n) Entregar regalos ou obsequios que non teñan a condición de mostras e cun prezo de venda ao público superior a 15 euros, como cortesía, e non como





método vinculado á promoción e venda ao público de medicamentos e produtos sanitarios.

ñ) O incumprimento dos requisitos, obrigas ou prohibicións establecidas na presente lei cando cause alteración e risco sanitario con transcendencia directa para a poboación.

5. Teñen a consideración de infraccións moi graves as seguintes:

a) O incumprimento da normativa autonómica vixente en materia de incompatibilidades.

b) A comisión dunha infracción grave cando, nos últimos cinco anos, o mesmo suxeito fose sancionado pola comisión dunha ou máis infraccións graves e as resolucións sancionadoras fosen firmes na vía administrativa.

c) O incumprimento reiterado e inxustificado por parte das oficinas de farmacia da obriga da dispensación de medicación que lles sexa solicitada pola/s persoa/s usuaria/s nas condicións legal e regulamentariamente establecidas.





Artigo 75. *Sancións e criterios de gradación*

1. As infraccións tipificadas nesta lei serán sancionadas con multa. Dentro dos límites previstos para as infraccións leves, graves e moi graves as multas se aplicarán no grao mínimo, medio ou máximo en función dos seguintes criterios:

- a) A negligencia, o grao de culpabilidade ou a existencia de intencionalidade.
- b) O grao de connivencia.
- c) O incumprimento das advertencias previas.
- d) A continuidade ou persistencia da conduta infractora.
- e) A cifra de negocios da entidade.
- f) A natureza dos prexuizos causados.
- g) O número de persoas afectadas.
- h) Os beneficios obtidos coa infracción.
- i) A duración dos riscos xerados.
- j) O tipo de establecemento ou servizo no que se cometeu a infracción.
- k) A reincidencia, por comisión no termo dun ano de mais dunha infracción da mesma natureza cando así se declarase por resolución firme en vía administrativa.

2. As infraccións leves serán sancionadas con multa de 15 a 3.005,06 euros. Dentro destes límites establécense os seguintes graos:

Grao mínimo: desde 15 ata 601,01 euros.

Grao medio: desde 601,02 a 1.803,04 euros.

Grao máximo: desde 1.803,05 a 3.005,06 euros.

3. As infraccións graves serán sancionadas con multa de 3.005,07 a 15.025,30 euros. Dentro destes límites establécense os seguintes graos:

Grao mínimo: desde 3.005,07 a 6.010,12 euros.

Grao medio: desde 6.010,13 a 10.517,71 euros.

Grao máximo: desde 10.517,72 a 15.025,30 euros

4. As infraccións moi graves serán sancionadas con multa de 15.025,31 a 601.012,11 euros, ou, de ser unha cantidade superior, ata o quántuplo do valor dos





produtos ou servizos obxecto da infracción. Dentro destes límites establécense os seguintes graos:

Grao mínimo: desde 15.025,31 a 120.202,42 euros.

Grao medio: desde 120.202,43 a 306.607,26 euros.

Grao máximo: desde 306.607,27 a 601.012,11 euros ou, de ser unha cantidade superior, ata o quintuplo do valor dos produtos ou servizos obxecto da infracción.

5. As sancións pola comisión de infraccións graves e moi graves serán publicadas no *Diario Oficial de Galicia* unha vez que adquiran firmeza en vía administrativa.

6. Sen prexuízo da multa que proceda impoñer conforme ao disposto no número anterior, as infraccións en materia de medicamentos serán sancionadas co comiso, en favor do Tesouro Público, do beneficio ilícito obtido como consecuencia da comisión da infracción. A resolución sancionadora determinará a estes efectos a contía do beneficio ilícito obtido.

7. Ademais, nos supostos de infraccións moi graves, o Consello da Xunta poderá acordar, como sancións accesorias, o peche temporal do establecemento, instalación ou servizo por un prazo máximo de cinco anos.

8. No caso de infraccións moi graves relativas a oficinas de farmacia, o Consello da Xunta poderá acordar, como sancións accesorias, a revogación da autorización administrativa e a prohibición do seu/súa titular ou cotitulares de poder participar, durante un período de cinco anos desde que a sanción sexa firme en vía administrativa, en calquera concurso público que se celebre en Galicia para obter a autorización dunha oficina de farmacia.






XUNTA DE GALICIA

Artigo 76. Instrución de expedientes sancionadores


A instrución dos expedientes administrativos sancionadores será competencia da inspección sanitaria, sen prexuízo das competencias que en materia de medicamentos veterinarios ten atribuídas a consellería competente en materia de gandería.





Artigo 77. Competencia sancionadora

Reglamentariamente determinaranse os órganos competentes para a imposición das sancións ás que se refire o artigo 75, sen prexuízo das competencias que en materia de medicamentos veterinarios ten atribuídas a consellería competente en materia de gandería.





Artigo 78. *Medidas cautelares*

1. Poderán adoptarse as medidas cautelares consistentes na clausura ou o peche dos establecementos, centros e servizos que non dispoñan das preceptivas autorizacións ou rexistros ou da actuación dos cales derive risco para a saúde da poboación, así como a suspensión do funcionamento ou a prohibición das actividades que se leven a cabo neles, ata que se corrixa os defectos ou se cumpran os requisitos establecidos.

2. Así mesmo, se como consecuencia da acción inspectora se apreciase razoablemente a existencia dun risco inminente e extraordinario para a saúde ou un incumprimento dos requisitos esixidos para a instalación e funcionamento de centros e establecementos, poderanse adoptar cautelarmente as medidas ás que fan referencia os artigos 26 e 31.2 da Lei 14/1986, do 25 de abril.





Artigo 79. *Prescripción*

1. As infraccións ás que se refire esta lei cualificadas como leves prescribirán ao ano, as cualificadas como graves, aos dous anos, e as cualificadas como moi graves, aos cinco anos.

2. O prazo de prescripción das infraccións comezase a contar desde o día en que a infracción se cometeu. No caso de infraccións continuadas ou permanentes, o prazo comezará a correr desde que finalizou a conduta infractora.


Interromperá a prescripción a iniciación, con coñecemento do interesado, dun procedemento administrativo de natureza sancionadora, e o prazo de prescripción reiniciarase se o expediente sancionador estivese paralizado durante máis dun mes por causa non imputable ao presunto responsable.

3. Así mesmo, as sancións impostas por infraccións leves prescribirán ao ano; por infraccións graves, aos dous anos, e por infraccións moi graves, aos cinco anos.

4. O prazo de prescripción das sancións comezase a contar desde o día seguinte a aquel en que sexa executable a resolución por que se impón a sanción ou cando transcorrese o prazo para recorrer contra ela.

Interromperá a prescripción a iniciación, con coñecemento do interesado, do procedemento de execución, e volverá transcorrer o prazo se aquel está paralizado durante máis dun mes por causa non imputable ao infractor.

No caso de desestimación presunta do recurso de alzada interposto contra a resolución por que se impón a sanción, o prazo de prescripción da sanción comezase a contar desde o día seguinte a aquel en que finalice o prazo legalmente previsto para a resolución do dito recurso.





XUNTA DE GALICIA

Artigo 80. *Prazo para resolver*

O prazo máximo para ditar e notificar as resolucións sancionadoras por infraccións tipificadas na presente lei será de nove meses.





XUNTA DE GALICIA

Disposición adicional única. *Convenios de colaboración*

A consellería competente en materia de sanidade poderá instrumentar a colaboración entre os colexios oficiais de farmacéuticos, organizacións non gobernamentais, organizacións e colectivos representativos do sector e a administración sanitaria, subscribindo a tal efecto os convenios de colaboración que procedan.





Disposición transitoria primeira. *Aplicación das disposicións regulamentarias vixentes*

Ata que se aproben as normas de desenvolvemento desta lei, será de aplicación a normativa regulamentaria vixente en todo o que non se opoña ao disposto nela. En concreto, no caso dos procedementos sancionadores iniciados ao amparo da lexislación anterior que se atopen en fase de tramitación, continuarán rexéndose no que respecta á competencia para a imposición das sancións, pola normativa vixente no momento de iniciación dos mesmos.





Disposición transitoria segunda. *Procedementos administrativos en tramitación*

1. As solicitudes de autorización de instalación, apertura e funcionamento, reforma, cambio de localización, transmisión e peche de oficinas de farmacia, pendentes de resolución á entrada en vigor da presente lei, rexeranse pola normativa vixente no momento de inicio do procedemento.
2. Aos procedementos sancionadores que se atopen en tramitación na data de entrada en vigor da presente lei lles serán de aplicación as disposicións sancionadoras vixentes no momento de produción dos feitos que constitúan infracción administrativa. As disposicións sancionadoras contidas nesta lei producirán efecto retroactivo en canto favorezan á persoa presuntamente infractora ou á persoa infractora, tanto no referido á tipificación da infracción como á sanción e aos seus prazos de prescripción, incluso con respecto ás sancións pendentes de cumprimento na data de entrada en vigor desta lei.





Disposición transitoria terceira. *Locais de oficinas de farmacia*

Os requisitos de acceso e zonas das oficinas de farmacia e dos seus locais previstos *ex novo* nesta lei so serán esixibles aos locais correspondentes á oficinas de farmacia de nova instalación, ou no caso de procedementos de cambio de localización ou reforma iniciados con posterioridade á entrada en vigor desta lei. Aos locais existentes nesta data só lles serán de aplicación ditos requisitos no caso de reforma substancial producida con posterioridade á entrada en vigor da mesma.





Disposición transitoria cuarta. *Servizo de garda e vacacións*

O sistema de gardas e vacacións establecido nesta lei será de aplicación a partir do 1 de xaneiro do ano seguinte ao da entrada en vigor da mesma.

Disposición transitoria quinta. *Réxime de transmisión das oficinas de farmacia adxudicadas no concurso convocado por Resolución do do 2 de xullo de 2018, da Secretaría Xeral Técnica da Consellería de Sanidade, pola que se convoca concurso público para a adxudicación de novas oficinas de farmacia*

O réxime de transmisión inter vivos previsto no número 3 do artigo 42 será de aplicación ás oficinas de farmacia adxudicadas no concurso convocado por Resolución do do 2 de xullo de 2018, da Secretaría Xeral Técnica da Consellería de Sanidade, con independencia da data na que este se resolva.

No caso de se producir a xubilación voluntaria da persoa titular antes do esgotamento dos quince anos previstos, esta poderá solicitar a designación dun rexente ata completar o período mínimo previsto para a transmisión.





Disposición derogatoria única. *Derogación normativa*

1. Quedan derogadas total ou parcialmente cantas disposicións de igual o inferior rango se opoñan ao disposto na presente lei, e, en especial, a Lei 5/1999, do 21 de maio, de ordenación farmacéutica.

2. Así mesmo, queda derogada a disposición transitoria segunda da Lei 9/2017, do 26 de decembro, de medidas fiscais e administrativas.





XUNTA DE GALICIA

Disposición derradeira primeira. *Habilitación para o desenvolvemento normativo*

Habílase ao Consello da Xunta para ditar as normas de desenvolvemento da presente lei.

[Handwritten signature]





XUNTA DE GALICIA

Disposición derradeira segunda. *Entrada en vigor*

A presente Lei entrará en vigor aos vinte días da súa publicación no *Diario Oficial de Galicia*.



Alfonso Rueda Valenzuela

Vicepresidente e Conselleiro de Presidencia,
Administracións Pública e Xustiza



Á Mesa do Parlamento

O Grupo Parlamentario dos Socialistas de Galicia, a través do portavoz e ao abeiro do disposto no artigo 122 do Regulamento da Cámara, presenta ante esa mesa a seguinte Proposición de lei de creación da Oficina de Control Orzamentario no Parlamento de Galicia.

Exposición de motivos

A Lei 1/2016, do 18 de xaneiro, de transparencia e bo goberno, na súa exposición de motivos alude á importancia do control cidadán sobre a actividade governamental nunha democracia non entendida tan só como mecanismo de elección de gobernos mediante sufraxio senón como un sistema de imperio da lei, coas debidas garantías e tutelas das liberdades e dos dereitos individuais dos cidadáns e das cidadás.

No mesmo sentido, establece que os mecanismos de transparencia e de bo goberno funcionan como contrapesos que garanten a protección da cidadanía fronte a hipotéticas arbitrariedades do poder público e o uso indebido dos cartos ou patrimonio públicos.

A dita lei establece no artigo 2 os principios reitores que se sinalan:

“a) Principio de transparencia, polo que toda a información pública é accesible e relevante e mais toda persoa ten acceso libre e gratuíto a ela, coas únicas excepcións previstas na lei.

b) Principio de accesibilidade universal da información pública, de xeito que tanto a información coma os instrumentos e as ferramentas empregados na súa difusión sexan comprensibles, utilizables e localizables por todas as persoas en condicións de seguridade e comodidade e mais da forma máis autónoma e natural posible.

c) Principio de participación cidadá, polo que se considera como obxectivo final dos mecanismos descritos na lei a provisión á cidadanía da información necesaria para exercer o seu dereito fundamental á participación nos asuntos públicos.



d) Principio de veracidade, en virtude do cal a información pública será certa e exacta, garantindo que procede de documentos respecto dos que se verificou a súa autenticidade, fiabilidade, integridade, dispoñibilidade e cadea de custodia.

e) Principio de responsabilidade, que supón que as entidades suxeitas ao disposto nesta lei son responsables do cumprimento das súas prescricións.

f) Principio de non discriminación tecnolóxica nin lingüística, que supón que as entidades suxeitas ao ámbito de aplicación desta lei arbitrarán os medios necesarios para poñer á disposición da cidadanía a información pública na lingua e a través do medio de acceso que a cidadanía elixa.

g) Principio de reutilización da información, polo que se facilita a difusión dela en formatos abertos para que a cidadanía poida aproveitar, para as súas actividades, os documentos e datos publicados.

h) Principios de integridade, honestidade, imparcialidade, obxectividade e respecto ao marco xurídico e á cidadanía no relativo á actuación das persoas que ocupen altos cargos.”

Xa que logo, reforzar a transparencia do noso sistema político, ademais dun mandato legal, é unha das funcións mais salientable que debe cumprir o conxunto dos poderes públicos de Galicia, dando resposta á crecente demanda cidadán existente neste sentido.

É neste contexto no que se propugna esta lei, que ten por obxecto a creación da Oficina de Control Orzamentario, dotada da necesaria independencia respecto do poder executivo da Xunta de Galicia e co fin de garantir o necesario asesoramento parlamentario nas cuestións que fan referencia á execución orzamentaria, así como para afondar nas análises económico–financeiras nos traballos a desenvolver pola Cámara lexislativa galega.

Dáse resposta deste xeito á necesidade de articular no Parlamento de Galicia un mecanismo eficaz de asesoramento técnico que vén sendo demandado desde os diversos grupos parlamentarios, baseado nos principios de obxectividade, transparencia e independencia, e co obxecto de facilitar igualmente a información dispoñible para o conxunto da cidadanía galega.

Así, a Xunta de Galicia deberá en todo momento, vía informática, e por medio da conexión en relación cos programas contables ou orzamentarios utilizados, informar ao Parlamento de Galicia da súa execución orzamentaria. Ademais a Oficina de Control Orzamentario poderá demandar tanta información considere e solicitar, no seu caso, as oportunas explicacións. Ao fronte deste departamento



poderá ser nomeado un director ou unha directora, entre persoas independentes e con experiencia nas disciplinas económicas e orzamentaria.

A Lei igualmente afonda nos aspectos da información periódica de carácter orzamentario e financeiro que debe ser facilitada pola Xunta de Galicia, no tocante ao grado de execución das diversas partidas que conforman o gasto público, á vez que completa a información non soamente aos orzamentos limitativos da Administración xeral autonómica e dos seus entes autónomos, senón para o conxunto do sector público galego, obtendo unha información máis ampla e integral. Mais cando o conxunto de sociedades, entes de dereito público e fundacións do sector público, moven unhas dotacións superiores aos 700 millóns de euros, e dos que actualmente non se recibe información periódica no transcurso do correspondente exercicio económico.

Artigo 1. Creación da Oficina de Control Orzamentario

1.- Mediante esta lei crease a Oficina de Control Orzamentario adscrita organicamente ao Parlamento de Galicia.

2.- A Oficina de Control Orzamentario goza dentro da Cámara galega de autonomía administrativa e terá plena capacidade para desenvolver as súas funcións, con independencia e obxectividade.

Artigo 2.- Funcións da Oficina de Control Orzamentario

Son funcións da Oficina de Control Orzamentario:

- a) Asesorar tecnicamente aos grupos parlamentarios en materia orzamentaria.
- b) Servir de apoio aos órganos da Cámara, aos grupos parlamentarios e a os deputados e deputadas no control continuado na fase de execución dos Orzamentos anuais da Comunidade Autónoma e do sector público autonómico dependente dela.
- c) Informar aos grupos parlamentarios e aos deputados e deputadas, especialmente aos membros da Comisión 3ª de Economía, Facenda e Orzamentos, da documentación relativa á aprobación, execución e liquidación do orzamento.
- d) Elaborar informes, comunicacións o resúmenes sobre a documentación á que se refire o apartado anterior, así como sobre a documentación de carácter económico e orzamentario recibida na Cámara, tanto por iniciativa propia da



Oficina de Control Orzamentario, como por solicitude dos grupos parlamentarios ou da Comisión 3ª de Economía, Facenda e Orzamentos.

e) Facilitar aos grupos parlamentarios e á Comisión 3ª de Economía, Facenda e Orzamentos a documentación suficiente que afecte a cada comparecencia con carácter previo.

f) Asesorar á Ponencia da Comisión correspondente na tramitación do Proxecto de lei de orzamentos da Comunidade Autónoma.

g) A información, asesoramento e apoio sobre calquera outra actividade parlamentaria de seguimento e control continuado do orzamento.

h) Calquera outra tarefa que, no ámbito orzamentario e económico, se lle encomende pola Mesa da Comisión 3ª de Economía, Facenda e Orzamentos ou polo presidente do Parlamento.

Artigo 3. Articulación da Oficina de Control Orzamentario cá Xunta de Galicia

1.- A Xunta de Galicia, a través da consellaría competente en materia orzamentaria, facilitará en todo momento e puntualmente vía informática á Oficina de Control Orzamentario a información necesaria relativa á súa execución orzamentaria, por medio da conexión en relación cos programas contables ou orzamentarios utilizados.

2.- Ademais, a Xunta de Galicia deberá de remitirle a seguinte información, publicados en papel e en formato dixital, e cun grado de concreción e desagregación suficientes para a súa análise e control, coa periodicidade que se indica:

a) Con carácter mensual un informe sobre o grado de cumprimento orzamentario do exercicio en curso, así como das modificacións introducidas, que deberá ser remitido no prazo máximo de 30 días ao remate do período en cuestión.

b) Con carácter mensual un informe sobre a evolución dos proxectos de investimento e do seu financiamento específico, que deberá ser presentada no prazo máximo de 30 días ao remate do período en cuestión.

c) Con carácter anual un informe sobre a liquidación orzamentaria, que deberá ser presentado no prazo máximo de 90 días ao remate do exercicio anual en cuestión.



Os ditos informes comprenderán igualmente a necesaria información de carácter contable e económico referida ao conxunto do sector público autonómico, incluíndo ás sociedades públicas mercantís, aos entes de dereito público, ás fundacións ou calquera outra entidade con presenza maioritaria da Xunta de Galicia.

3.- A Oficina de Control Orzamentario poderá demandar tanta información orzamentaria precise, así como solicitar as explicacións por parte da Xunta de Galicia que considere necesarias para o cumprimento dos seus fins.

4.- Igualmente poderá encargar aqueles informes externos ou de asesoría que considere necesarios.

5.- A Oficina de Control Orzamentario, coa información recollida, e con independencia doutras tarefas que puidese realizar, elaborará os seus propios informes que serán remitidos, para o seu coñecemento e valoración, a todos os grupos parlamentarios.

6.- Os ditos informes serán publicados puntualmente na páxina web do Parlamento de Galicia.

Artigo 4. Informes económicos e orzamentarios das iniciativas lexislativas

A Oficina Galega de Control Orzamentario poderá, por petición expresa dos grupos parlamentarios ou da Mesa do Parlamento, completar os informes económicos e orzamentarios que acompañen as diversas iniciativas lexislativas do Goberno, informar sobre as iniciativas lexislativas presentadas polos grupos parlamentarios, e resolver as consultas que se lle formulen sobre temas de carácter económico ou orzamentario nas diversas cuestións parlamentarias que se susciten na Cámara.

Artigo 5. Comisión reitora da Oficina de Control Orzamentario

A Oficina de Control Orzamentario rexerase pola súa Comisión reitora, que estará formada por:

- A Presidencia, que ostentará o presidente ou presidenta da Comisión Permanente Lexislativa, 3ª de Economía, Facenda e Orzamentos do Parlamento de Galicia.
- Vogais, que serán os deputados e deputadas que asignen os diversos grupos parlamentarios, garantido, en todo caso, a presenza de todos os grupos.



- Un secretario ou secretaria, con voz pero sen voto, que será a persoa que ocupe a Oficialía Maior do Parlamento de Galicia.

A través desta comisión reitora canalizaranse as solicitudes que realicen os deputados e deputadas, así como os grupos parlamentarios.

Os deputados e deputadas pertencentes a esta comisión reitora non percibirán ningunha clase de retribución especial engadida por pertencer a ela.

Artigo 6. Dirección da Oficina de Control Orzamentario

Ao fronte da Oficina Galega de Control Orzamentario estará un director ou directora que nomeará a Comisión reitora por proposta da Presidencia da devandita comisión, entre persoas con probada experiencia e expertas en disciplinas económicas e orzamentarias, independentes da Xunta de Galicia e logo do correspondente proceso público de selección.

A Oficina Galega de Control Orzamentario disporá dentro do orzamento do Parlamento de Galicia dunha partida específica para o seu funcionamento.

A Xunta reitora deberá aprobar anualmente o anteproxecto do orzamento que se integrará no proxecto de orzamento do Parlamento de Galicia, no que se reflectirán os medios necesarios para o seu funcionamento.

Disposición transitoria primeira. Posta en marcha efectiva da Oficina de Control Orzamentario

Autorízase á persoa titular da consellería competente en materia orzamentaria e contable e á Presidencia do Parlamento de Galicia a impulsar os mecanismos que posibiliten a posta en marcha efectiva da Oficina de Control Orzamentario no prazo máximo de seis meses desde a aprobación desta lei.

Disposición transitoria segunda. Regulamento da Oficina de Control Orzamentario

A Mesa do Parlamento de Galicia, unha vez escoitada a Xunta de Portavoces, aprobará o Regulamento sobre a composición, estrutura e funcionamento interno da Oficina de Control Orzamentario, así como da súa Comisión reitora.

A Presidencia do Parlamento de Galicia realizará as actuacións necesarias para proceder, no prazo máximo de seis meses, á aprobación do Regulamento, así



como asignar os medios necesarios para a posta en funcionamento efectivo da Oficina Galega de Control Orzamentario.

Disposición derradeira única. Entrada en vigor.

Esta lei entrará en vigor ao día seguinte da súa publicación no *Diario Oficial de Galicia*.

Pazo do Parlamento, 12 de marzo de 2019



ANTECEDENTES

- Lei 37/2010, do 15 de novembro, pola que se crea a Oficina Presupostaria das Cortes Xerais.
- Lei 1/2016, do 18 de xaneiro, de transparencia e bo goberno.
- Decreto Lexislativo 1/1999, de 7 de outubro, polo que se aproba o texto refundido da Lei de Réxime Financeiro e Orzamentario de Galicia.
- Lei 4/1987, do 23 de decembro, de Orzamentos Xerais da Comunidade de Madrid para 1988.
- Regulamento do Parlamento de Andalucía.
- Regulamento do Parlamento de Cataluña.
- Regulamento da Asemblea Rexional de Murcia.
- Regulamento do Parlamento de Canarias.

Asinado dixitalmente por:

Xoaquín María Fernández Leiceaga na data 12/03/2019 16:28:55



ESTRUTURA DO BOLETÍN OFICIAL DO PARLAMENTO DE GALICIA

1. PROCEDEMENTOS PARLAMENTARIOS

1.1. PROCEDEMENTOS DE NATUREZA NORMATIVA

1.1.1. NORMAS APROBADAS

1.1.2. PROPOSTAS DE NORMAS

1.2. PROCEDEMENTOS ESPECIAIS DE CARÁCTER INSTITUCIONAL

1.2.1. INVESTIDURA

1.2.2. MOCIÓN DE CENSURA

1.2.3. CUESTIÓN DE CONFIANZA

1.3. PROCEDEMENTOS DE CONTROL E IMPULSO

1.3.1. CONTROL SOBRE AS DISPOSICIÓNS DA XUNTA CON FORZA DE LEI

1.3.2. COMUNICACIÓNS DA XUNTA DE GALICIA

1.3.3. EXAME DE PROGRAMAS E PLANS

1.3.4. ACORDOS, RESOLUCIÓNS OU PROPOSTAS DE COMISIÓNS ESPECIAIS OU DE INVESTIGACIÓN

1.3.5. MOCIÓNS

1.3.6. PROPOSICIÓNS NON DE LEI

1.3.7. OUTRAS PROPOSTAS DE RESOLUCIÓN E ACORDOS

1.3.8. PROCEDEMENTOS DE CONTROL ECONÓMICO E ORZAMENTARIO

1.4. PROCEDEMENTOS DE INFORMACIÓN

1.4.1. INFORMACIÓNS REMITIDAS POLA XUNTA DE GALICIA

1.4.2. SOLICITUDES DE COMPARECENCIA

1.4.3. INTERPELACIÓNS

1.4.4. PREGUNTAS

1.4.5. RESPOSTAS A PREGUNTAS

1.4.6. SOLICITUDES DE DATOS, INFORMES E DOCUMENTOS DE DEPUTADOS E DE COMISIÓNS

1.4.7. RECONVERSIÓNS POR FINALIZACIÓN DO PERÍODO DE SESIÓNS

1.5. PROCEDEMENTOS RELATIVOS A OUTRAS INSTITUCIÓNS E ÓRGANOS

1.6. PROCEDEMENTOS DE ELECCIÓN, DESIGNACIÓN E PROPOSTA DE NOMEAMENTO

1.7. PROCEDEMENTOS RELATIVOS AO DEREITO DE PETICIÓN

2. ELECCIÓN E COMPOSICIÓN DO PARLAMENTO, RÉXIME E GOBERNO INTERIOR, ORGANIZACIÓN E FUNCIONAMENTO

2.1. ELECCIÓN DO PARLAMENTO

2.2. COMPOSICIÓN DO PARLAMENTO E DOS SEUS ÓRGANOS

2.3. RÉXIME E GOBERNO INTERIOR

2.4. ORGANIZACIÓN E FUNCIONAMENTO DO PARLAMENTO


3. ADMINISTRACIÓN DO PARLAMENTO DE GALICIA

4. INFORMACIÓNS E CORRECCIÓNS DE ERROS

4.1. INFORMACIÓNS

4.2. CORRECCIÓNS DE ERROS





PARLAMENTO
DE GALICIA

BOLETÍN OFICIAL DO **PARLAMENTO DE GALICIA**

Edición e subscricións:

Servizo de Publicacións do Parlamento de Galicia. Hórreo, 63. 15702. Santiago de Compostela.

Telf. 981 55 13 00. Fax. 981 55 14 25

Dep. Leg. C-155-1982. ISSN 1133-2727

